





文莊集卷十六

上書

上章聖皇帝乞應制舉書

宋

夏竦

撰

景德二年十一月將仕郎守潤州丹陽縣主簿臣夏竦  
謹齋戒昧死再拜上書崇文廣武聖明仁孝皇帝陛下  
伏以國家採漢唐故事恢復制科網羅賢俊鎔範太平  
陛下聖政日躋廣分條品崇二聖之丕緒冠百王之盛  
事萬方文明多士勇進嘉魚有得賢之詠白駒無空谷  
之戀臣生逢聖明幼肄簡牘久困寒賤不能自達去年



秋薦名天府屬邊障多故羽書蠡午陛下臨遣宰臣折  
衝河朔先臣供傳遽之職立矢石之地忘家殉國失身  
行陣陛下哀臣孤幼任之州縣執掌之暇服膺稽古欣  
睹明詔遽釋憂慮何則陛下廣文武之科而興文武之  
治夫鉛槧方策文之器也辭藻辯博文之用也御器以  
道則仁義忠信無所不至矣御用以變明刑敢教化無  
所不達矣步騎金革武之器也敢毅勇復武之用也御  
器以道則竒正威惠無所不逮矣御用以變則盈虛紆  
直無所不許矣蓋古者愛其道而今也愛其器古者觀  
其變而今也觀其用故文武之材比及於古者可多得

若能臨器而知道臨用而知變精儒墨者兼之以韜畧  
善攻取者贊之以學術則將相之材去此焉往願陛下  
詳而察之若陛下必擇狂夫之言思納愚者之慮垂旒  
下拱渴待忠讜則臣願以賢良方正能直言極諫科名  
赴明試則賢良之科斯為具體夫賢者智之範圍良者  
德之蹊徑方者慎履名教正者升遠邪佞直言足以陳  
時弊極諫足以敷讜議時弊既陳則明於體用讜議既  
敷則<sup>造</sup>於教化明體用者豈昧於六建達教化者豈微於  
七德故臣之區區盡在於此陛下<sup>惟</sup>原本缺所志辨而  
明之裁而擇之若陛下以枕石漱流為達則臣世居



市井若陛下以金榜丹桂為材則臣未忝科第若陛下以鳩杖駘背為德則臣始踰弱冠若陛下以竒戈控弦為勇則臣生本綿弱若陛下令臣待詔公車條問急政對揚紫宸指陳時事猶可與漢唐諸儒方轡並驅而校其先後矣伏願陛下念忠臣之後寬萬死之責名詣闕下令畢其辭退就鼎鑊死且無恨于忤聖聰臣無任待罪戰汗惶懼之至臣某稽顙頓首死罪死罪

狀

降聖節進奉狀

伏以真游降鑒誕啟於僊源令節凝祥茂宣於帝社臣謬塵樞近叨奉恩榮慶東戶之期久披於丹質祝南山之壽幸及於嘉辰載惟縷帶之微願續乾坤之德

進瑞稻圖狀

伏以嘉蔬吐秀黔首告祥初擢一莖異劉欽之界內乍分三穗疑蔡茂之夢中既介祉於清流爰考靈於瑞牒此蓋尊位皇帝陛下四方無事萬國可封嘉雨霈乎仁恩陽春流乎惠澤河洛圖書而並至元符黃瑞以偕臻將讓德於岱宗致耀祥<sup>於</sup>嘉穀足使維揚昔日追媿稽生南海遐方遙慚九熟未讓竒於穎麥詎貽誚於兩歧掩周祖之維縻陋漢宣之靈稷臣叨提郡印獲覩國祺



既當列狀以升聞敢不奉圖而稱獻天孫助祭願陪百里之禾清廟薦新敢繼神倉之穀

再進瑞稻圖狀

伏以一莖三穗已告靈休踰月再生益符馨烈祥經闕載鴻策靡聞陋唐侯異畝之祥冠周室盈車之瑞此蓋尊位皇帝陛下儀三五之景鑠憲八九之明光當時龍半漢以爰飛致嘉穀歲蕤而薦秀臣敢不重圖瑞穎再貢丹墀願隨縮酒之茅廣備泥塗之禮

謝宣召入院狀

右臣今月某日翰林待詔某至臣所居奉宣聖旨召臣入院充學士者使軒倏降恭被於褒言宸澤旁流擢升於內禁循涯失措荷寵若驚伏念臣本乏異能仰逢昌運先皇帝初臨軒陛首賜科名遂結綬於仕途俄濫巾於顯次本西垣更直叨預於司言內閣參榮彌慙於備問自爾踐更中外遷貿星霜出則分銅竹之符乏龔黃優異之績入則游龍鳳之館非嚴樂侍從之才去歲以式罷藩條歸朝法坐改畫省貳卿之列附神臯內史之權輦轂密清蓋仰遵於聖訓條綱明其實動稟於朝經僅免曠官敢期進秋遽指恩於中旨俾廁職於內庭矧王府之近扁擬金鰲之真境論思為重或接於睿謀演



潤攸施式嚴於密命豈期孱昧可稱甄陞此蓋伏遇皇  
帝陛下上智燭幽純仁求舊以臣一門遭遇荷異寵於  
累朝念臣孤跡踐揚歷清塗於二紀特垂綸渥擢寘禁  
林謹當仰副文明虔脩職業雖已臨於暮齒亦勉勵於  
瑣才奉四境<sup>之</sup>文謹裁於書詔循三輔之政用肅於都畿  
報國是圖捐軀斯在

謝賜御書詩狀

右臣今月二十四日宣和門御閣蒙恩面賜臣御書侍  
宴詩一首者宸極凝暉方參於進牘奎躔分曜猥奉於  
匪頒蹈躍相趨慶榮交及伏惟皇帝陛下文明繼志剛  
健承天暢謨訓於七經精字書於八體每罷華光之講  
即抽路扈之毫載揮魚網之賤屢竭金壺之墨翻回鸞  
鵲盈溢縑緗言念侍臣曲記龍潛之舊特推恩賚俾瞻  
鶴企之蹤但傳世以寶藏固無階而報塞歡呼感抃倍  
萬常鈞

謝賜馬狀

右臣今月某日石侍禁張永德到府伏蒙聖慈賜臣細  
馬二匹者戰功未立蕃錫載加乘拜靡勝榮懼交集伏  
念臣本微湊略誤委半符閔隴宿師賦發滋廣河湟伐  
叛誅納尚微悵無毫髮之勤稍增營塢之氣不圖使驛



輟賜乘黃事異仲都之能禮厚儀和之賚軍容增壯幕  
府相趨此蓋伏遇皇帝陛下俯念舊臣久居邊瑣將安  
戍後曲示眷懷天庥分頒既誤及勞之典具裝是飭誓  
先盡敵之行冀效銖分仰醕賞勸

乞脩南京大內狀

右臣伏覩大中祥符七年二月一日赦敕節文應天府  
升為南京正殿以歸德為名臣到職後躬詣大內謹視  
筦籥其正南內門上有先朝題其榜曰重熙頌慶之門  
樓皆損動其下只是依舊雙門未變列郡之制雖有兩  
闕雉堞又無朵樓內城之中並無歸德之殿但是顏垣

茂草內有真宗皇帝御製御書南京頌駐蹕詩碑石一  
片小屋遮蔽未曾建立其東北隅小亭子一座內有先  
皇御製御書駐蹕詩四首粉版門牖不嚴塵埃所闇臣  
職在居守理合奏陳者伏以高丘仰當大火寶勢形勝  
佳氣鬱蔥藝祖肇基之邦聖朝根本之地發祥薦祉應  
天順人由七十里而興天乙是資於景毫累三十世之  
王文昌始大於岐周用建名都實陪上國與中天而對  
峙企洛宅以相望至官局廨居咸從改革而乃闕廷宮  
掖悉未繕修漢啟南陽之都唐重北門之館並資壯麗  
以示威神况茂陵之餘烈方宣真廟之鳴鑿未遠必欲



仰模太紫上憲甯取備九寢之儀敬千門之式慮煩力  
後或費財征臣今乞依先朝敕旨只創歸德一殿安駐  
蹕詩版又以宮室之儀門闕為重猶取諸侯之制未成  
王者之都欲乞於南端闢正門三闔東西增朵樓二座  
所貴冗工至鮮不日可成仍乞選差八作司臣察將帶  
工匠到此計度却於東京木場事造材植繫棧浮汴赴  
當京修蓋伏望聖慈特賜開可所貴宮闕之度稍合於  
彝章祖始之基益隆於景命有光鴻祚永贖皇圖

王相公謝賜手詔狀

右臣伏以鳳蘊靈文方承於睿覽芝函密詔曲喻於慈

衷祇誦已還兢榮併集伏念臣素微材識竊慕希夷猥  
奉綸言總讐金格嘗以三清真境宮室殊名六洞僊遊  
羽儀異品雖沿波而糅見盡物本以兼談因寶藏之縱  
觀有瓊編之斯在咸區分於部類可悉數於名稱紫府  
絳臺臨文而備見雲裳藻衛伸紙以咸窺爰奏御於穆  
清用仰資於欽奉伏遇皇帝陛下祇膺道蔭昭事真源  
遽班溫雅之辭俯示褒優之意草門輝耀永誓於寶藏  
蕊簡研覃更期於率勵荷照臨之莫報積感懼以增深

牋

正旦賀皇太子牋



某叩頭言伏以緹管發春清臺啟歷舉椒觴而第頌爰  
表著儀徇路鐸以宣風甫新元朔恭惟皇太子殿下明  
誠淵塞粹性昭融趨帝室以問安陰天枝而繼體闈門  
講學茂胄席之溫文祕錄儲休荷太霄之顧謐珍圖大  
定景貺日躋式膺獻歲之祥永固重離之祚某肅將明  
命遠託倅車效秋實以無階望日圓而尚遠無任抃躍  
歡呼之至限以守官不獲稱慶宮庭謹奉牋陳賀以聞  
某以歡以抃叩頭叩頭謹牋

啟

謝生辰禮物啟

伏以函鍾紀律當炎景之宣威大昴儲精屬鉅賢之命  
世伏惟某官嘉猷濟俗懿業代工渭水凝祥蚤協佐姬  
之兆嵩高發詠爰逢生甫之辰顧禪贊以非勤唯頌延  
而增懇有少微禮具如列牋

五月旦啟

伏以氣正南訛日纏東井當沐蘭於楚俗仍聚藥於周  
官伏惟某官任重麾旄功昭彝鼎達宏規於義府聳諒  
節於宗藩履此令辰倍增休祉豈期台念先示鈞函感  
佩之私不任下懇

六月旦啟



伏以候格長羸氣當溽暑雨濯枝而泛灑螢化草以流  
輝依惟某官金石存誠箕裘濟美荷封崇之茂寵宣保  
鄣之殊勲履此令辰倍增嘉佑特承睿獎先示誨函感  
荷所深不任下懇

七月旦啟

伏以西顛司辰素商紀節湛清曦於鶉陸泣瑞露於僂  
盤伏惟某官寄重藩宣誠堅翊戴著撫封之令望揚分  
閫之英風履此佳辰別迎殊渥豈期台念先示鈞函感  
愧所深伏增下懇

中書回夏州七月旦啟

伏以金方戒序夷則紀辰起越桂之淒風騰楚蘭之文  
露伏惟大王忠規夙茂亮節允孚早膺祚土之封克奉  
誓河之寵履茲令朔倍納清休豈謂鈞慈先貽台翰感  
銘之至但切下情

八月旦啟二首

伏以律中南呂候及西成漸鴻陸之來賓自雷門之舊  
豫伏惟某官氣鍾間傑任重藩維萬銘鼎之世勲厚直  
茅之帝寵履之令朔倍納休祥豈謂台慈先貽鈞翰感  
佩之至伏切下情  
伏以南呂還宮仲商紀度陟少明而夕月奏幽籥以迎



寒伏惟大王保塞宣誠戴君罄節仰奉文思之德茂昭  
忠毅之規屆此令辰倍承嘉裕豈期台念先枉鈞函媿  
佩之私不任下懇

九月旦啟三首

伏以肅霜紀候清日揚輝澄楚潦之餘波發豐鐘之逸  
韻伏惟某官忠純挺操屏翰宣威克揚固圉之勞上奉  
同文之化屆茲令朔倍納殊祥

伏以肅霜戒候采菊在辰築場圃以務藏飭衣裳而維  
則伏惟大王書忠甲令襲寵和門克彰濟美之規允奉  
撫封之寄屬茲告朔諒集維祥豈謂怠慈先垂鈞翰鏤

銘之至不任下情

伏以肅霜在候無射屆辰禮聞習吹之儀詩著授衣之  
詠伏惟某官真純秉節英勇傳家鏤勲業於景鍾載忠  
規於甲令屆茲吉朔益迓殊祥豈謂台慈遠貽鈞翰其  
於佩服不任下情

十月旦啟

伏以候屆寒英日纏天駟謹擇漁而登賦設朋酒以休  
農伏惟某官位冠齊壇威宣漢塞仰奉重熙之運載彰  
式遏之功履此令辰倍膺殊祉

賀冬啟



伏以日在建星斗連營室開漢門而候景登魯觀以書  
雲伏惟大王韓韓凝華振振著信茂奉展親之德永膺  
分物之封履此令辰倍延休祉

代僕射相公賀冬啟

伏以建星辰日伯趙司辰發黃鍾初九之聲孕太極函  
三之氣伏惟大王分輝帝室流譽戚藩早膺選德之封  
茂奉睦親之化履茲令序倍納殊休

代集賢賀正啟

伏以黃鍾紀律伯趙司<sub>辰</sub>紀雲物於魯臺奏版書於漢殿  
伏惟大王雍和著譽信厚流徽蚤疏四履之封茂著二

南之德履茲令序倍納殊休



文莊集卷十七

宋 夏竦 撰

啟

賀樞密相公啟

伏審欽膺恩制榮踐鈞樞天下幸甚恭以某官六學宣  
精三英毓德鍾半千之運為帝者之阿衡著畫一之規  
作海內之明表而自弼諧先聖啟迪嘉謨甄別九流裁  
成庶務允屬繼明之治愈隆圖任之恩總日月之畿坐  
康雅俗治金刀之府釐定舊章因是正位巖廊延暉台  
極來遠獨陳於大計懷柔允贊於聖功洎申伯于宣藩



國暫均於德澤而王商真相戎夷彌憚於威名一昨發  
御朝真靈區展案亟入司於留籥實簡自於帝心果協  
剛辰誕膺明命正樞庭之重任兼鼎席之崇資延登而  
體貌特隆詠頌而品流交慶某自陳席幕曲荷陶銘限  
從朝倫闕司奏記積歡心而負異屬微疹之方嬰肩輿  
已及於東平力疾將趨於北闕瞻望抃躍實倍常鈞

賀樞密尚書啟

伏以朝廷巡祭於后祗嚴配於神壤惠加無際慶洽有  
生飲至辨儀既行清廟疇庸命爵首拜元臣凡受甄陶  
罔不欣抃伏惟慶慰恭以吏部天官周禮謂之太宰尚

書古職虞典實曰納言漢儀首冠於列曹魏制統司於  
選職大則綜釐庶政次則品擇九流世獎茂勳代無虛  
授伏况國家崇端右之職湏經遠之材簡銓堯而正司

率宰衡之兼總以是望高台鉉任重名槐為一人乃瞻  
之資作九服具瞻之地豈止聯曹建禮奏事明光象北  
斗之樞儀總南宮之喉舌伏惟某官<sup>允</sup>釐帝載敷道化源  
左雄奏章動為故事唐約表疏出自手書郭賀仁明  
子魚清淨議事務從於寬大臨下盡削於煩苛天光自  
比其丹青蜀劍豈方其明達萬事不理誰賡胡廣之歌  
三讓彌高屢下鄧彪之詔惠加含郵道服播紳授符則



戎后款閔借箸則羗豪厥角四方無事萬國可封輔成  
垂拱之功肇建東巡之議司先置則瑞芝蓬涌紀鴻猷  
則麗藻金相暨汾水頌祇扈鸞旗於馳道神光燭夜奉  
龍袞於方壇禮備元黃功高鍾鼎以是職彌崇於四  
輔官獨守於六卿偉齊以僕射兼司平叔以侍中并領  
比之聖日難望清塵然而晉寵茂先尚開五府軒崇風  
后合冠三階冕旒注意以非常珪組傾心而久待某棲  
投有素欣幸最深其如四海無親三台寡援生成有路  
只期文命之昌言薦進非材敢望巨源之密啟

賀樞密尚書啟

伏審祇奉制恩入長樞府伏惟歡慶恭以某官懿文偉  
望俊德端成常袞為當世才臣魏相練本朝故事告徽  
宰府克懋贊襄之勞賦政別京洽著保釐之績會朔方  
之奸命虛漢幄以頌材尺詔亟頒追車肆覲延英入閣  
特從雙日而開上兵伐謀升總萬幾之祕圖任之恩惟  
舊幅員之係胥同某出自恩門適居塞屏瞻恭符而在遠  
趨翹館以未期下情無任依投欣抃之至

賀樞密副使啟

伏審欽奉茂恩榮叅密命伏惟慶尉伏以某官豐規粹  
遠明識周通細油博達於經玉帳負高於武畧肇修邊



好當資出境之材繼總戎昭允奉撫封之寄勲庸克  
著望實彌優果膺丹宸之東求入贊鴻樞之獻納載隆  
命數允副僉諧某素仰聲猷方增慰懌重荷緘封之禮  
過形撫抑之辭感佩銘藏不任下懇

賀高樞使啟

伏審祇膺冊命就陟樞庭恩出主知事榮物聽恭以  
某官器涵剛實才貫幾深秉忠諒之一心出誠明之正  
性旦暮聖辰之會翺翔朝弁之華寢竭猷為益隆體貌  
鴻樞之柄專掌於繁機英袞之司行光於寵拜畢大臣  
之能事允率土之具瞻某職貳侯封述遙台座無階慶  
踴有地挺銘

賀西樞相公生日啟

伏以函鍾統律方熾於陽暉崧岳降神載生於英哲伏  
惟某官豐規茂粹懿德冲明獻納嘉猷翊宣大政左弧  
紀慶爰偶於誕辰厥篚修誠敢陳於善祝有少微禮具  
如別牋

賀叅政給事啟

右某啟伏審祇奉制恩榮陪宰府伏惟慶慰恭惟叅政  
穹高生德嶽鎮降靈服百行以麗躬通三才之懿學矧  
自便蕃鼇禁尹定神臯時厥中庸略去苛細詳言昭理



世咨其清端心在公帝諒其節庶績思人景命方初官  
惟其人政將安往果峻瑣闈之秩式均鼎鉉之尊公枳  
是維國柄攸屬任隗之見重於世楊綰之自化於人凡  
在有知孰不載躍某早游恩館幸託鴻鈞歡欣所深聳  
忭無已

賀內翰劉給事啟

右某啟伏以祗奉寵召勸講宸闈伏惟懽慶恭以某官  
道冠九流識包三極闢先儒之塞路首映人師適列辟  
之舊章寅禪治體外內之猷畢告天人之爵俱隆矧自  
引避當途鎮臨巨屏沈規粹範泯崖略於天和鯁議純  
誠留矩模於邦直高風益邵清望攸歸果當纘服之初  
顯副優賢之命丹書訪道禮厚於周臣重席談經事隆  
於漢會繫茲舊德翊乃聖謨咫尺威顏世逮華光之對  
丹青神化佇宣台極之暉凡在有知罔不翹首某幸窺  
邸報方遠師門忭躍之誠等夷增倍

荆南府知府學士李給事啟

右某啟早由踈隘獲造凝嚴官修之業無聞天覆之恩  
未報因代親而有請爰昧死以陳章冒禁成愆免官出  
守山藪藏疾荷先聖之哀矜豺虎食讒仰至明之未減  
四移使竹六變年灰藐是零丁宜夫湮沒某官觀仁以



過棲愛於情目習井以拯沈馳飛郵而刻奏抵非羣議  
申證非辜謂其夙侍清光少知於治體嘗司洪誥多識  
於訓辭高議霜明至言金重倬為外舉足感上心而安  
國之灰久寒從茲起焔虞翻之骨非媚慮玷知言佩服  
所深敷陳罕既

賀司徒侍中啟

某啟伏審欽膺朝冊增寵正司天下幸甚恭以某官崧  
極儲靈穹高格業任隗沈正鯁議不回山甫將明庶邦  
是式而自惟新大政首幹鴻樞三后在天仰當於顧諟  
七月同軌寅奉於寢園送往惟虔勞還甫渥遽刊章而  
避寵示挹道以敷風興讓官師益厚忠溥之俗推恩師  
傳更隆尊尚之儀果反剛辰聿嚴厚禮廣真封於食采  
增崇號以褒功誕告外庭布昭盛德凝和寶鉉發景乾  
台萬樞藹其休聲六幕翔於善氣懷生之品載躍攸同  
某出自恩門久繫餘照欽聞明命增抃早衷伏恨條職  
所拘不獲躬詣台屏某無任欣榮激切依歸之至

賀玉清承旨左丞學士啟

右某啟伏審華園勸講奉咫尺之威顏曲密侍祠貳榮  
煌之台座仰聆恩制伏積欣榮恭以某官峻極降神穹  
高生德探二儀之奧祕游六藝之粹精而况内天外人



含華隱曜方圓詎表其際榮悴靡槩於懷鑒達萬情塵  
光羣累一言不立澄寶海以皆空兩半同陞游玉池而  
甚樂天和益茂心照逾清允副旁求仰禪初載宸帷訪  
逮靖館凝嚴荷慶於需恩式倍於鼎輔暫階陰器行陟  
近司凡在有生罔不延首某自貽痕玷仰誤品題久困  
沉塵闕通牋記右臂為彈方欣鴟炙之求良冶鑄金敢  
有莫邪之請門闌尚阻夢寤增勞聞命欣愉倍不倫等

賀晏內翰除景靈宮副使啟

右某伏審祇奉恩俞榮加命秩伏惟慶慰恭以某官氣  
鍾辰律識貫天淵秉亮節以光朝鼓英辭而高世風昭

賢業茂著師規慎基命之惟新罄訏謨而入告周旋三  
接導筆舌於天常申教萬幾諧笙簧于帝典鴻猷灼叙  
羣品推高果由巖近之司更益便蕃之數開榮瑣闥克  
重於官聯作貳殊庭載光於使範紳綏動色竹素揚芳  
實乃眷之是膺俾斯文而有屬當陽圖舊已旌朱邸之  
賢絕席奮庸焉避黑頭之拜恭承嘉會超絕前聞某屏  
去周行外司漢竹慶登賢之有命悵申禮以無階仰繫  
門闌豈任飛越伏恨條職所拘不獲躬詣台屏某無任  
欣躍依歸激切之至

賀轉運啟



石某伏審祗膺中詔顯領外臺伏惟歡慶恭以某官學術粹精風猷凝峙不侮不畏式是古人以猛以寬濟乎中道獨出羣公之右允當上帝之心引職憲牀抗稜使斧濱江而北寵貨至饒兼刺百城聿當一面方欽聞於調發矧物集於京坻風旨所傳歡愉交集某幸司符竹切仰瞻幄獲在恩庥但深跋躍

賀轉運啟

石某伏審密命蕃恩外臺專領仰要司之簡拔實衆志之歡愉恭惟某官清懿飾躬通閎迪望并包淑哲邁遇光華資榮近以久陰副僉擇而此厚糾繩康俗適著於聲猷餽給富邦暫迂其毅斷即聆高最越在親嚴諒伊遐邇之懷併是瞻祈之切某微姿極下大庇方依戀幸彌深志銘無既

賀屯田啟

伏以屯田博達文心詳明治體擯桑孔之術不議貨財斥申韓之談專講仁義近徇常牒出倅盛藩蘭桂之芬振陽已遠牛鼎之器甄擢匪遙惟善順於天和佇大光於朝議傾依所至願頌尤深

賀舒州李相公啟

右某伏審肅膺鴻沛起殿大藩伏惟慶慰恭以某官沈



正秉彝清和懿德經三聖之變細繹惟深貫萬物之儀  
臣隣有翼曩屬先朝違豫臣黨與姦密嘯羣邪陰窺時  
柄允繫哲輔克殄凶謀防檢未萌澄綜多辟虹氣由是  
霽止霄塗為之密清精貫三辰賴深百辟終以狎聞蜚  
語引去上司傳深致文越處南喬孤節彌諒高揖自冲處  
榮悴之交人言無間失左右之手國體幾虧大號繼  
明巨慝咸露狐鼠失其深穴豺虎食於譖人協氣雲翔  
皇明電照澄洗司制延即舊臣春惟襄贊之賢首被優  
深之渥慰藉良原厚毗倚增隆袁安涕洟念深於王室謝  
傳憂樂望結於蒼生雖暫假於鎮臨必坐階於密勿至  
公來復有識相歡薦紳傾耳以聆風斯文聯冊而刊美  
洪惟高範絕出常均某恪守郡條欽聞朝渙不獲拜伏  
車下奔走道周但私慶於單危將永歸於延鑄

壽州相公啟

右某伏念閫外之邦宜嚴所守弗當便道增仰貴台託  
身塊北之鈞早繫大庇之託熒煌之坐合謹彝儀恭惟  
某官純槩光朝大猷稽古河帶山礪預叅藏府之盟蕭  
規曹隨聿冠宗臣之列席兩朝之綈賞寒四海之具瞻  
雖復暫避繁機出臨巨屏長城萬里固蒙福於靈河華  
闕九重率乃心於王室疇庸方切圖任有歸佇再正於



洪區永增輝於盛旦空疎之迹終始是依某無任依棲  
禱頌激切之至

潭州李兵部啟

右某啓伏念某屢竊虎符甚安鳩拙不當便道絕欵緒  
風遯望朝髦夙分霄壑地頗賒於河澗潤心但切於旌搖  
恭以某官直道在公懿文飾政入端朝著羣公讓於苗  
馮出總使條舞吏空其囊橐逋民咸復美化大敷然自  
即本股肱召莫先於季布治緊寬猛政烏避於國僑傾  
聰旁求用紆勞想炎涼改候葆嗇是宜頌咏之私不任  
丹懇

賀薛待制知開封府啟

右某伏審祇奉制恩榮莅天邑伏惟慶慰恭以某官宏  
猷體遠精識鈎深嘉言奮乎黈聰懿文緝乎邦憲而自  
宸帷訪逮計省踐揚瑞鳳覽暉儀鴻造羽體貌之榮雖  
渥彌綸之業未宣乃眷浩穰遂茲戶正羣玉上帝之府  
克峻於官聯太微三光之庭茂延於晝接式夫古訓時  
厥太中前趙後王方仰追於懿範左輔右弼均協贊於  
訂謨遘東惟新游談胥慶某出麾外服遐抃吉音燕履  
莫趨鳧藻增躍

正旦賀內翰啟



右某伏以書得夏時標物生之令候星回呂紀在歲始  
之常經恭惟某官履道淵冲炳文宏博總直總轡以高蹈  
擁大璫而遠遊通內相參決之謀進扶鴻業代主上深  
厚之訓輝映前圖企聽簡良居承彌化率是海隅之象  
盡調鼎寔之和伏想贊翊循經練願多暇履茲初歷倍  
納蕃禧某早飾冗才叨偕巨庇祝頌斯厚敷述奚殫

賀冬至啟

右某啟伏以南至啟辰聯星貫彩闔漢門而候景登魯  
觀以書雲恭惟某官文武兼資勲賢莫式仰鍾河岳之  
瑞聿膺夢卜之求德冠生民道高羣后宗祊倚重方宣  
可大之功海域具瞻皆罄履長之祝某式提譴成久累  
洪鈞阻陪介壽之班唯積戀軒之感依投繫仰倍萬品  
流

問候太傅啟

自間風規屢移年籥忽墜奔雲之翰彌蒙搖旆之心伏  
惟某官懿德遠聞芳猷夙茂旅弓白羽妙絕於苛倫玉  
帳絳宮精通於機會佇奉戎昭之寄式彰勇冠之材六  
轡方馳清談尚阻惟希冲養以副願懷

問候尚書啟

近拜郵書仰通鈴閣遽承鈞誨寔聳朝榮獎飾有加銘



藏周喻恭以尚書浚明著德寅亮成規四方于宣允叶  
維周之詠萬邦為憲方歌受社之詩佇正位於近司永  
流徽於民表伏冀為國自受副民具瞻某早荷重知誤  
攀多士銜舊恩而莫報懷深頌以徒增棲倚之誠倍百  
常品

省副郎中啟

右某伏以三陽之律初宣式新庶彙一歲之端肇正爰  
著前經恭惟某官妙味宅心懿文秉德越丁復旦潔履  
仕途計部贊規克謹牢籠之典丹墀詔爵即膺近密之  
賢方屬令辰諒延殊祉某夙叨齒記但積瞻依

回雄州館使太保啟

屢馳丹懇仰瀆清規遽捧報章實銘懿念伏惟某官書  
忠甲令紀績太常已久肅於邊庭行入參於樞府方新  
歲律更順天和願頌之懷倍百常品

免奉使啟

比膺使指徃奉歡盟選授至艱道途差近况多侑幣實  
濟空拳然念頃歲先人沒於行陣春初母氏始棄孤遺  
義不戴天難下單于之拜哀深陟屺忍聞禁休之音車  
府露章槐庭泣血王姬築館接仇之禮既嫌魯子回車  
勝母之游遂輟荷兩宮之大庇載三事之昌言退安四



壁之貧如獲萬金之賜某官力持名教數獎孤寒屬高  
利於摘山闕言心於奏記何圖驛置先墜書筠俯哀蹈  
義之心不辱資忠之訓永唯佩服何銘但藏早情不任感  
咽依歸之至

文莊集卷十八

啟

謝授知制誥啟

蒙恩特授前件官充職者紫微祕掖塵書命之司丹屏  
儀曹叨奏疏之任尚兼載筆仍贊殊庭恩獎有加心願  
無措此蓋某官蚤垂顧采曲借光儀是致鴻鈞誤甄微  
物矧著龜先見嘗昭示於前期松柏後彫忽遠流於榮  
問夫何後進辱此重知顧報遇而末由但銜恩而有素  
區區之懇莫逾萬分

宋 夏竦 撰



謝起復授知制啟

伏奉制命前件官陳避不允者靡依茹痛瞻風木以隕  
心圖舊延慈俾墨哀而從政未能毀滅惟竊震惶竊念  
某本以諸生嘗階近侍如絃謬直伺免甚愚爰六剖於  
銅符遽九遷於圭齋采蘭就養解綬而靡遑陟此銜哀  
號天而罔續式遵治命歸葬近畿宅兆未安抔圉如此  
豈謂誤傳詔版許復故棲三歲免懷乞終于喪紀兩宮  
愛下莫寢于徽章強整殘軀再司舊物此蓋某官薦延  
有素保宥特深致茲放浪之蹤薦游清切之禁懷鈞久  
廢但重學於畫脂弄杼非工敢更言于織素唯期盡瘁

少謝生成卑情不任感媿哀咽之至

謝某官啟

祇荷寵光不任榮懼伏念某器能無算材識非奇幸際  
會于昌辰亟忝塵於近列徒更寄任莫著聲猷竊位樞  
庭詎彌綸於密命倚員鼎席莫寅亮於大謨此者伏遇  
國家欽奉真游誕均蕃錫加勲臣之美號進公府之崇  
資兼益戶封愈隆命數循涯多媿敢忘周任之言昧進  
誠難亟效范宣之讓雖削章之繼上顧出綵之已行但  
知受以周章固退思而恤墨此蓋某官因承清宴曲借  
餘輝致此庸虛存塵優渥敢不盡瘁事國少逃濡味之



譏夙夜在公更竭員山之力感銘之至不任下懷

謝大王啟

叨膺恩制載錫徽章祇受以還統惶靡措伏念某遭逢  
運會忝冒官常自膺圖任之私莫著謨明之效昨者國  
家欽承真御遜諭鴻源範肖象以惟寅建殊庭而有翼  
豈謂具臣之幸持膺置使之榮仍益爰田尤彰異數顧  
滿盈而是懼實避讓而靡諧叨據踰深周章罔踰此益  
大王嘗因密侍夙借公言致曲荷于寵靈惟仰銜于殊  
造永言媿佩但切丹衷

南京到任謝二府啟

仰承獎擢伏積統榮竊念某本實庸人妄干榮進早緣  
誤寵亦玷近司上賴保全獲均勞逸一昨東秦閔雨下  
戶將飢猥奉詔函就分使竹殊昧救寧之理莫寬旰是  
之憂事雖欲於防虞言或多於過切當朝廷責實之際  
固巖廊精汰之辰襍被自隨屏居是分豈謂伏遇某官  
俯矜舊物深屈至公仰贊恩章俾釐留府典銅魚之宮  
鑰合銀兔之軍符周微子之封圻漢節侯之寄任載惟  
騫短局副坯陶惟更勵於駑材用少疇於元化感慚刻  
著倍百常鈞

永興謝二府啟



出自坯陶伏深感戀竊念某人品驚下世胄孤平繼典  
九城薦更三紀無一毫之可錄悵十駕之空勞嚮者召  
自別都俾司會府服勤徒切析利非精矧從視事之辰  
便主摘山之議逮成奏格幾汗簡書爰以細札垂文陽  
郊錯事泰壇備物方畏瘵官齊幄還衡甫寧悸魄攝須  
稍逸垂翅將安彌仰恃於哀矜冀且參於下吏豈謂伏  
遇某官因陪漏刻誤憶姓名議四鄙之羽書按東曹之  
邊瑣拔於端右付以戎昭六蠹啟行光華籍甚萬錢賦  
祿訾計差溫中外誚其何功文武譏其不次載惟求舊  
深累至公敢不更勵忠規上醅元化滅烽末日既耻於

家為數級有時或期於天幸指玉闕而非遠瞻鉉府以  
方遙媿荷依投萬倍倫等

授宣徽使謝二府啟

右某蒙恩特授前件官者元化均分近司進拜殆非功  
次有誤寵章伏念某偶以孤生謬緣薄技攀仕塗者四  
十載竊民政者十五城而况兼護將屯悵絕弦之未逐  
創圖羌事慚唾掌以難裁猥陞四貴之華頗玷十連之  
長人譏多幸自訟何勞此蓋伏遇某官登翼大猷矜嗟  
舊物量衆恩於邊瑣較前職於省闈昭衡石之至平灑  
霖雨之餘潤萬金屢費適寬責帥之文十使兼加方切



摧兇之效敢不益張晴瞻更屬偏裨庶集羣勞仰醅坵  
冶

永興再任謝二府啟

右某蒙恩授前件職并知永興軍府到任上訖出自坯  
陶伏增感懼竊念某頃嘗佔畢素不知兵特假憧麾比  
長閑中之成親臨矢石俄為隴上之行徒肄業於蟠矛  
固追功於橫草猥荷向隅之愍猶書守塞之勞箕頽與  
區方膺於外徙河潼右壤亟復於故棲實總攝於百城  
且并獲於諸道金印駢組盡魚數使之名玉帳建牙爰  
當上將之任倚辦尤重堪副誠難此蓋伏遇某官登翼  
皇猷布昭元化圖殫目中之敵先增閫外之權首念撲  
忠驟加寵數既騰譏於帥賤將責效于功除敢不祗慎  
戎昭恪遵廟畧武暢西海儻橫厲之有成生入玉關固  
哀憐之是望永言報塞敢憚勤劬

并州謝二府啟

右某蒙恩原本而陞用武寸效曾無北道乏人僉謀猥  
及負責斯重戴恩則深咽喉要衝股肱舊地旁連馬邑  
直控鴈門周宣中興茲嘗薄伐漢武懷遠此焉觀兵屹  
然形勝之區紛爾轉關之地思得良士倚為大藩某素  
無兼才暗於臨事精誠內耗齒髮久衰上馬據鞍雖自



矜於矍爍登車攬轡尚有志於澄清然念孤蹇多艱功名難偶事方創置謗輒隨生孤根易搖衆口難辨指嘗疾臂志不酬心尚賴丹宸至明黃閣垂庇曲藏痕殿勩賜保全勉策暮年俾圖後效孟明屢辱定叔三戰之功孫贖何堪終期萬弩之發

回謝二府啟

幸會昌辰誤塵近列仰荷同寅之德唯增有覲之慙豈謂鈞慈曲記生日俯垂榮誨形厚意以居多仰佩殊私鏤丹誠而增切所貽盛禮焉敢克當

涇州謝二府啟

仰戴坯鎔實難堪副伏念某本由寒進妄齒清流三品崇高屢更於都座十城罔養遽剖於軍符未嘗練達兵鈴習知戎警猥奉臨涇之役敢辭負羽之行漢惟六郡之雄唐兼四鎮之重宜得飛將倚為長城豈謂伏遇某官登翼大猷斟酌元化曲矜嗟於舊物特選補於邊屯仍加置於使聯俾專司於武旅望巖塗而馳戀撫駢組以知榮懼上累於甄陞益俯加於策勵兼程赴治周覽根心顧樓雉之未完且租更之甚闕塗烟在望固當西鄙之咽喉營壁空存無復北庭之組練願更寬於轡策庶漸葺於封陲愧荷依投倍百倫等



謝魏閣使啟

伏以大尉先令公維嵩宅粹間氣凝祥媯汭降嬪極三朝之眷待台槐襲慶陟四近之尊崇功在旂常政傳謠頌仰圖英烈允屬鴻儒豈謂某官特示哀誠見求鄙製雖早承諸獎備熟於音徽而載罄庸虛莫周於事實緝粹音而僅就鏤翠玩以為慚敢冀仁明過垂恕察統灼之至不任下情謹齊沐撰成先令公墓誌銘一首隨狀呈納

謝叅政啟

昨以總司帑載謬纂綱條洎叅於權衡竊審詳於鈞石

石豈謂鴻私曲被優詔薦頌將並刻於堅珉庶永傳於內府恭以某官豐規冠世明識過人幸久荷於殊私遂仰塵於英聽遽示緘封之禮載形獎與之辭况近列之至崇辱前銜之過重但銘藏之增切顧當捧以尤難悚揚之誠倍百倫品

謝西京尚書啟

伏以尚書懿文雅正妙識融明避中鉉之鈞衡奉西都之冕齋惟保釐之允迪固樂只之攸宜方企旆旄遽承簡翰玉音無斁式慰於深心鼎席薦陞佇光於善頌傾思銘佩文不盡言



回大王啟

幸鍾運會誤玷台衡屬當生育之期方積劬勞之感猥蒙鈞念曲示誨函仰承仁厚之私俯集媿銘之素所頌盛禮安敢克當

上親王啟

某啟幸會熙明叨塵機近揣分深慚於昧進依仁實賴於同寅式當生育之期方積劬勞之感敢期鈞造特賜榮緘荷眷與以尤深積銘藏而莫喻所貽厚禮焉敢克當

謝樞密相公生辰啟

本以非才幸逢嘉會莫著謨明之效但貽昧進之譏豈謂鈞慈俯記生日降緘滕之榮問示筐篚之厚儀載揣庸微固難克受感銘之至不任下情

謝宰臣惠食物

伏奉殊恩俯頌異味仰惟顧錄蓋不遑寧伏念某胷緒寒微學識蒙闇無近親可以仰給無先疇可以躬耕幸依賴於門闈得叨塵於宮序西崑抱槧遽獲於依仁東閣食魚仍容於庇族曾無鳴盜之淺術徒恃簪履之舊恩時奉光儀特惠顏色掩愚陋之累聳殊尤之觀復念食貧深矜分薄屢垂賑濟俾育孤遺當雨雪之既零知



藜藿之不給載形軫卹輟賜饌羞食五侯之鯖無慚上  
容持左手之螭寧媿昔賢顧舉族以分甘念何門而展  
効心同白水期誓節以無渝命等鴻毛冀疇恩而有所  
退量微忝唯切戰兢

回學士啟

遠承尺牘無示青編究作者之楷模振古人之風烈况  
斯文方盛公議有歸佇膺前席之求幸息沉僚之歎感  
銘所至願頌良多

回謝學士啟

伏審光奉茂恩榮膺寵數伏惟某官豐規茂粹雅度淹

通龜紫傳家允叶芝蘭之譽緝緝志克彰黼藻之文  
而自躬鵠飛英銜標擅譽遽升榮於匠署仍閔掌於郡  
條大宣五袴之誥爰上三年之計果試言於宰府亟引  
籍於朝闈石室討論緹油之祕遠蘭臺著譔颺茜綬  
之光華彌著清徽允符公議某正深慰懌忽奉緘滕載  
闕雅麗之辭唯積媿銘之素

西京留臺謝少卿啟

向者令嗣還臺榮緘垂問屬常居於賜告遂九闕於報  
章延企清徽但深遐想近審蓬丘進秩示獎於耆儒梓  
府分曹尚優於冲攝諒惟褒命彌聳高風尚遠披承更



希遵愛

回徐舍人啟

某聞太一三光之庭仰昭於天象內史八枋之法實掌  
於王言聳禁近之榮階極斯文之盛選欽承茂德允謂  
當仁恭惟某官風格粹和識度彌遠懿行推於倫黨奧  
學本乎宗師書觀縻賢盛有滯留之歎官曹率職累更  
繁鞅之勒環望流聞淵衷妙簡亟試才於槐府俄錫命  
於綸垣景祚增光有識交慶固將辭成楚賈體變漢風  
芥藻凝猷鼓動中和之氣羽儀嚴侍翕彰竒異之能奈  
預朋從忻聆進擢結綬甫陪於邇躅披滕遽沐於芳牋

恭窺辨麗之功益仰謙虛之美其於佩服罔罄敷宣

漢東太守司封啟

某頓首頃歲從莊穆靈駕嘗傾蓋滎陽道中二十年矣  
比者謫官江濱久陪隣好過客翩翩未嘗不沐虛獎尋  
屬使節東案淝水大門荒阡特蒙增殖松楸今已成林  
其為恩舊若此而疊委公函遽茲相外豈以後進驕氣  
未祛是將待小子於名利之交歟幸緣雅素改賜手誨  
庶依仰之有地新葺已拜受訖還源觀文敢冀垂借今  
附雲峯二器聊飲從者沅暉電激塵事蠶午某限守半  
章阻越宴坐不勝瞻望感戀之至



集賢相公辭官啟

伏奉制恩併加命數載循忝冒實積兢惶伏念某性識  
顛蒙聲稱淺昧幸遭逢於期會叨踐歷於官常遽塵樞  
要之司亟豫台衡之任循名責實曾無致遠之能具位  
妨賢深負食浮之媿此者伏遇國家欽承天命茂對僊  
游昭積累之鴻源顯顧諟之景祐式均大慶首及近司  
進執璧之宗階正躍池之峻秩仍益爰田之賦兼增真  
食之封受寵若驚顧何功而可報知止不殆將昧進以  
尤難已瀝寸誠虔通勅奏願寢既行之命庶寬若厲之  
憂伏望某官府諒曲哀特矜非據因從容於晝接為啟

迪於昌言儻罷命書永銜恩造

東樞太尉相公辭官上大王啟

伏奉制恩併加命數揣循非據啟處不違伏念某器識  
甚微聲猷素昧遭逢朝會忝冒官常踐清切之司固慚  
於潤色奉彌綸之議莫効於將明薦膺加等之恩亟列  
秉鈞之任雖思退食益媿妨賢此者伏遇國家至德符  
通真遊昭假茂對式均於純錫誕敷首被於寵光進掌  
武之崇資益褒功之懿號仍加井賦兼益真封雖堂陞  
於務隆示褒優而過分顧斗筭而易滿懼顛躋以貽憂  
已恭拜於囊封乞退還於詔命伏望大王俯矜短拙用



軫怔忡因入覲於凝嚴為特伸於敷奏儻諧誠請永荷  
恩私

僕射相公辭官啟

大慶方均鴻恩曲被省循非據啟處無從伏念某器識  
顛蒙聲猷淺昧從政乏靖恭之譽代言無雅奧之辭徒  
以幸會休明誤膺眷獎亟正台衡之任薦塵揆路之資  
維石巖巖莫允具瞻之望伐檀坎坎甚貽素食之譏此  
者伏遇國家道化休明聖風醇暢感真游之報降諭仙  
緒之綿長欽修茂對之儀誕受聿懷之福式覃異渥首  
及近司瑣闥分曹荷寵章之至重琳宮置使奉明命以

惟新仍加數於爰田兼益封於真食踰涯既極昧進誠  
難苟竊祿以無厭必曠官而負媿已陳奏牘願寢出綸  
伏望某官曲諒庸虛深矜悃悞因入趨於三接垂特達  
於一言冀收渙汗之恩用息怔忡之懇

辭官上大玉相公啟

固避恩私未俞誠請省循過分隕越無從伏念某本以  
遭逢獲諧幾近成亭徹警曾微借箸之勤武帳承顏空  
備影纓之列每奉承於成算動遵守於舊章但敷臣子  
之常規無益朝廷之大政歲月滋久尸素居多深懷昧  
進之憂將避妨賢之路豈謂寵靈薦降命數尤崇今備



職於彌綸復正名於宥密揣躬內訟懼貽覆餗之虞瀝  
懇露章願寢出綸之命葵心雖切天聽未迴已再瀆於  
凝嚴期特收於渙汗佇聞得請用息端憂伏望某官特  
諒曲哀俯矜非據因奉清閒之宴為陳特達之言儻罷  
近恩永銜殊造

僕射相公謝授官啟

降成命於慶霄靡容辭避集殊榮於瑣質但切兢惶伏  
念某幸會聖明叨承天寵乏胡廣中庸之譽昧孔光周  
慎之規四海同文莫借籌於武帳萬錢受俸徒充位於  
巖廊此者伏遇國家欽奉真游誕昭仙緒式均茂渥首  
及具臣進秩黃樞寔正秉鈞之任列司恭館肇膺置使  
之榮復加數於爰田仍益封於真實寵章彌峻輿議謂  
何深媿曠虛之質獲叨進陟之榮感愧彌增敷叙奚悉



欽定四庫全書

文莊集卷十九

宋夏竦撰

上巡撫使裴司封書

右伏以國家幅員億萬廢古封建州縣之治責在庶官  
用一賢則數十百里有受其賜者用一不肖則數千萬  
屋有當其暴者故朝廷年間屢下詔書切則所在長吏  
察舉良士而吏道益雜賢者益寡不肖者愈衆其故何  
哉蓋薦舉之官罔思沮勸事有驅走暴露艱險利弊無  
功而多過者非清苦勤謹則不用也事有宴安溫潤平



易整葺無咎而多譽者非親舊暱幸則不用也皆謂公  
舉受賞不若私舉受罰故舉制益艱而舉狀益謬情害  
於道可勝紀哉使忠信者惕惕自晦什處伍列但以道  
俟人人不知則俟他人他人不知則復俟他人終不敢  
以心腹肝膽從人以求知也浙江東西地長千里亦有  
退伏兢慄茹蔬飲水以待人者待之不得則復待之復  
待之不得則有中夜而起望象魏而北嘆思得賢使者  
觀省南夏按察良苦無何精誠所感陰陽有開果遇執  
事擁傳東下諭朝廷之意勞問高年踈決囚繫士之有  
所待者皆歌忭相慶如早穎焦枯而甘雨垂降誠以執

事豁達正直寔諤剛毅為國家諫諍之冠冕為蒼生號  
訴之梯石終不忍使可以鎔鑄翦拂者沉滯於下位然  
則執事慰千者壽不如退一貧殘減萬筭杖不如進一  
賢才貪殘退則不待慰而自安矣賢才進則刑不得  
減而自省矣貪退賢進民安刑省則執事之功可與太  
平無為者相上下豈當與錢穀鹽鉄之官較輕之哉某  
丹陽一掌版籍吏耳自幼及長問執事之風恨不能執  
羈勒於門下以滿夙昔之願今執事揄揚明天子之德  
慰勞吳會之民故敢竭思慮冒罪憲少布腹心於左右  
惟執事者裁念之若令諸有待者不復于他人則某之



區區百世幸甚其再拜

兩浙運使姚鉉書

伏以國家之制內外分職內則中書以發號令樞密以掌兵政三司以計國用外則輪運之司使令方面其職有六其政有五糾姦隱明簡稽察利害平筦權通商賈重廢置之謂六職舉賢使能報功卹刑愛民之謂五政六職修則國必豐其財五政則舉官皆稱其職豐財則無重斂稱職則無弊事然則六職之要在乎糾姦隱五政之大在乎舉賢能何則若執事之麾下地長千餘里官不啻數十百員人心如面罔或純一貪夫徇利皆曰

上官煩劇不暇按省故安于懈惰嗜于賕賂以浼執事果知而罪之則為惡者沮矣廉吏砥節皆曰上官明允有能必舉故服於勤恪甘於冰蘖以待執事執事果知而賞之則為善者勸矣然則多糾惡不如多舉賢傳曰禹稱善人不善遠矣其是之謂歟故某之有待於執事也非一朝一夕矣其本無他材癖嗜儒學雖不得經指而頗知戒訓居貧而固其節臨事而專其守勾乙案籍之暇則伏讀先王之書日飯寒蔬數十本若牲牢水陸之味而又侑之以鍾鼓歲服敗綈數千縷若衣丈繡紈綺之裳而又映之以珩珮非不知富貴之不悅貧賤之



可厭也。蓋富而憂不若貧而樂者也。嘗念事父之日，食  
飫饘，藿衣繒，厚絮無何，近丁家禍，墮于徒勞。縣官日給  
斗粟，數十百錢，同爨十餘口，嗻嗻然皆有菜色。必貨什  
器質，衣食而後充其費。窮如是，困如是，誓不忍學穿窬  
之盜，蠹耗蒼生而苟且衣食。雖清白之吏，忠信之民，以  
心許我而時命艱蹇，終鮮知己。昨以道干少鄉陳公公  
以一言譽之而未深省也。退而度生成之地，無出執事  
之門，何則？某為童之年，嘗聞執事豁達正直，提幹吾道。  
暨今處麾下，復大聞執事薦拔良士，盡公無私。夙夜繫  
繫，然恨不能負綬執鞭，以遂欣慕之心。今少鄉有鄱陽  
之命而執事按行常潤，某之區區如熱得濯，但恨偶繫  
負薪之疾，不能興不及稽首衡鑑之下，仰干題品之主。  
豈天復未開某以明公知之乎？願執事哀卹窮滯，聽察  
言行，若矜其廉慎，擢於行伍，必能恪居官次，守死善道。  
不敢貪慢以累明德，若念其愚直，舉之諫科，必能待詔  
公車，對揚王庭，不敢佞媚以辱通鑒。詩云：惟其有之，時  
以似之。書云：舉能其官，惟爾之能。是則善有所在，公其  
捨諸。惟昊天曷日，知我之不欺於執事也矣。惟執事辨  
而明之，若執事聽之以為是，誠幸矣。若不聽之以為非，  
亦幸矣。是與非窮與達，皆取必執事，願執事不惜一言。



而裁之於戲日月逝矣功名未立丈以足言頗至狂直

上知潤州陳麗天書

伏以外諸侯之重二千石之貴唱首太平必舉賢雋夫  
良樂之殿乘黃伏阜上僊之室榎楠在御豈有賢太守  
之庭而無良士蓋知與不知爾伏念某四歲結髮從師  
執鉛槧者十五餘載矣去年再踐場屋薦名天府方將  
交闕春闈鼓行文陣屬邊陣多事簡書蠶午遣宰輔折  
衝何朔先人奉辟清之命供傳遽之職發兵間道陷於  
戎事帝用追念行加等之贈舉嗣襲之典命於柴毀之  
際固讓不聽外廷有補以縣吏夙心素業堙鬱無訴今

者豈遭遇執事總秉部政威望隆峻銓度人物哀卹  
孤幼故敢以片言薄技深自某薦所望執事近觀厥言  
遠察其行蕭艾之畹可擇蘭菊鳧鷖之渚亦有鴻鵠勿  
謂冗官而非秀考詩云惟其有之是以似之書云知人  
則哲傳曰舉爾所知禮稱推賢而進之之易謂拔茅連  
茹故文子之舉管庫趙孟之出淹滯善有所在人其舍  
諸然某之所望不敢逮此但覲執事鑒其好學少迴惠  
故使他人無庸賤之謗公府減奴隸之責今勾乙之暇  
得和鉛弄翰薦舉之際許解官就試必能昂首掉尾自  
求騰蹕上以副先人之心下以遂為儒之志遂得待問都



堂揚擁今古射策紫墀條對急政將不在他人之後以  
辱公舉語其報効則有先王仁義之道在惟下執事者  
裁之

上開封府廉獻書

伏以國家因襲唐制小宗伯歲貢多士率以至公之器  
裁為慎選之具而尚士流私議泥而不通身處孤寒則  
望權門而怨豪族名籍禮部則陵後生而幸金紫故賢能  
之書未上而毀譽之言已滿殊不問其藝如何耳某以  
為銀黃之族不無材智金玉之室亦有忠信天以乘黃  
越國豈待十駕而邁逆蒙射鵠何須再發而中是以林  
居野處不足以自賢三應五上不及以自貴惟善之所  
在爾但孤進有材則居豪右之上昂族多藝則冠士流  
之首又何待畧踐場屋多歷年所而後預等甲英傑者  
哉故某居寒賤未嘗怨有雋造未嘗憂誠以公道有所  
屬也今伏遇執事幹張斯文採擷英特豈敢自昧默而  
不言伏念某四歲從師讀書七歲學詩九歲讀賦十有  
一而學文柰何天陋其辭不能脫穎而出今年甫冠帶  
方敢抱所有冒鄉舉苟執事照之以龜鑑量之以公器哀  
哀其右右其枝得致師文陣賈其餘勇輝煥士林飛躍  
亨衢則執事之惠非止謂生死而肉骨於戲以先王仁



義之道取我者我當以先王仁義之道報之豈敢引蛇  
雀故事飾為虛言惟執事者裁察之

上晁迥舍人書

伏以先王知文之可以守天下士之可以司文德故擇  
聰明方正之臣居左右侍從之列思得薦進以廣儒雅  
然則疏冕之側賢者不敢自私其祿皆欲顯忠良拔沉  
滯以自效故君明臣忠而後良士大夫進焉帝采龍興  
奄有萬國禮樂之臣列於王庭而陞文章之職居顧問  
之地十而有一猶比間也迺者執事步臺閣慰有令譽  
帝用明試擢居近臣斯文載光遠近交慶孤寒之士皆

離蔬釋躄翕然有膏梁之望誠以皇上之明執事之忠  
千載一時不可失也伏念某生長閭巷結髮事師抱六  
經知談仁義執刀筆如為紀述先哲之行從政之事雖  
失其具體而得其枝派其如恹恹京輦間困於塵埃公  
卿門闥峻如天梯而不可履物不終否有時而泰果遇  
執事不有清貴惠顧寒賤賜間於清閒之際而勉其勞  
苦固非敢徼一面之福幸失得之舉但念服鄒魯之訓  
累歲月之功不敢自賢以妄進不敢自愚以自退伏冀  
執事平權衡以權其輕重開龜策以決其疑貳設鍼石  
以導其聾瞽使迷途無長往之歎苦學無虛費之勞傳



曰朝聞道夕死可矣蹤跡如是勤拙如是惟明公裁之  
答杜侍郎書

月日具官夏某齋被再拜復書於某官某跪啟溫教數  
四成誦仰銜意愛至感至慰某資性婞很門緒單子零  
丁士途孤苦萬狀惟惟高明素所諒悉不圖蟲篆之伎  
猥當越鈇之：戎畧方警理不可辭竭忠盡愚深自策  
勵豈意天幸有二成於鉅賢內手捫心何階至此也哉  
秦川舊都土風豪侈氣勢相高禮義幾廢腐儒淺識以  
為漢唐遺老衣冠舊俗可以三代德教化之過客貽賤  
以迂闊相笑小人詆訾或浸淫上聞前使所謂隣城嗤  
其不能也而執事力庇其非稱以為是鏢金積羽言下  
頓消此天幸之一也黨項餘孽跳梁徼外宿舊亡沒靡  
所容度加以罷輟無他智術但憶黃卷中一兩事若武  
安之守鴈門謹烽火明斥堠饗士習射數歲不亡失終  
然破虜羊祐覲峴南各保分界無求細益陸抗以為彼  
專為善此專為暴是不戰而自服也終亦平吳心頗慕  
之以逐麋之犬尚不顧兔豈有將王師而循小利以一  
華人易一黨項者哉是欲堅壁清野以須遠略不求目  
前首級之效前之所謂邊兵皆以為怯者也而執事獨  
護其短飾以威名衆言十七衆譽隨之此天幸之二也



矧五原塞外地平道闊自古西戎入寇之路臨涇孤壘  
去大虫峴止八十里無梟將勁兵控扼衝要而賊騎遠  
去高奴山谷纔屬地險兵厚謀臣猛將併在一城而逆  
黨窺之無他但勇其難而勿其易謂非材者不能輕重  
於敵不足顧也其於謹備西北敢不夙夜竭節以奉明  
戒延安之警沿邊將佐皆被朝旨秣馬厲兵分歷賊境  
以為穀援旋聞賊騎遁去皆如明識之所前料也所恨  
者未能縛致我首戮之藁街草壯變黃尚煩廟筭飛芻  
輓穀重擾邊民憂寤傍徨未知攸濟又念本出寒緒不  
遠人事但謂學古入官以為得計焉知以書御馬為世  
所嗤獨明公生之憐之豈孔門之道果不負于後人耶  
何鉅賢之眷眷若此乎東望旌祭無任瞻依感戀之至  
不宣某齋被再拜



欽定四庫全書

文莊集卷二十

論

宋夏竦撰

定四時別九州聖功孰天論

先王之有天下也仰觀乎天俯察乎地以四時為佐  
故歷候不得不正也地以九州為紀故疆理不得不別  
也昔在帝堯稽法天象申命羲和期三百有六旬有六  
日以閏月定四時成歲暨禹乘四載分別九州隨山刊  
木洪水無害然皆有古帝王之聖功而有區別焉夫聖  
人經始萬邦勞心百度皆欲先天時而後地道也三皇



之季盛德廣大陶唐氏慮天時之不順正朔之不叙節  
候之失度日星之失次歷算之失數人民之失所乃命  
四岳欽若上天歷象日月星辰敬授人時所以明天道  
也洪水襄陵羣生昏墊夏后氏踈鑿山川流導四瀆分  
田壤之等降定貢賦之隆殺桑土既蠶生民粒食所以  
正地道也夫天時正則霜雪風雨於是乎可信上下經  
紀於是乎可象亡甲羽毛於是乎茂育政令教化於是  
乎可期故辰弗集其房而夏君征其畔官火猶西流而  
仲危罪其司歷蓋百王之大典上古之彞訓也然則定  
四時成歲何先乎閏餘說者曰周天三百六十有五度  
四分度之一以三百六十日為一歲餘六日三十日為  
月月行疾又歲餘小盡六日故五年再閏以定四時之  
氣也夫地道別則播種耘藝於是乎有常賦役職貢於  
是乎有典原隰墳衍於是乎定位昆蟲魚鼈於是乎有  
宅然則平水土何先乎九州說者曰州者疇也言疇其  
土而分別之也蓋閏餘不正則歷象不叙歷象不叙則  
天紀擾矣田疇不分則貢賦不至貢賦不至則人事廢  
矣傳曰太上立德其次立功堯之道定四時而修天紀  
立德者也禹之道別地利而正人事立功者也功德之  
際固不同也



九功九法為國何先論

夫有國家者稽攷往制裁為政術故彞論攸叙萬事允治經緯不紊於繁上下皆底於道然則以典故為政者其大有二有九功焉書曰水火金木土穀正德利用厚生是也有九法焉用禮曰制幾封國設儀辯位進賢興功建牧立監制軍詰禁施貢分職簡稽鄉民均守平則叱小事大是也然則致治之本何從而先昔八世之君不相沿襲帝者有帝道而御天下王者有王道而御天下帝道廣而大其制也簡故其民從之而不哂王道明而正其制也密故其民從之而不違當其陳于九功舜

禹之世其言要而其用也普其帝制之餘乎正九法于姬周之始其言辯而其用也周其王制之餘乎夫萬物非五材不用故九疇以五行為首民非五穀不食故八政以食為先不正德則教化不達故書云德惟善政不利用則民事不濟故易曰日用不知不厚生則國計不豐故書云民惟邦本由是善為國者修五材而民用足矣貴穀而民食豐矣正德而天下之心服矣利用而邦家之用濟矣厚生而百貨之本達矣故六府三事允治然後可以制畿封以正其法辯儀位以節其事進賢才以懲勤建牧守以司察詰軍禁以繩糾施職貢以制財簡



鄉民以施教均守則以結信正小大以表禮著為先聖  
不刊之典垂為百王不易之道蓋夫帝制者尚道德者  
也王制者尚法度者也先道德而後法度則民懷之而  
從上矣若去道德而專任制度則四海之政官府之事  
將有察而不勝者矣於戲臯陶周公之心可以知之矣

舜無為禹勤事功德孰優論

天生烝民立之司牧寔曰天子天子張必官設吏布德  
行惠以懷萬民驅之四方上下惟其所從在其治一也  
而其道固不可同矣三五之君其治之至其德之盛際  
天接地垂映列辟者皆曰舜禹則舜禹可以謂之盛德

夫舜以無為而治天下禹以勤事而陟元后然則無為  
勤事其有隆殺矣夫聖人功業既殊教化皆異其德隆  
者其功逸其德殺者其功勞逸者合於造化而合於物  
者也勞者滯於形器而立事者也故言事者勞逸之際  
不可不察也夫無為者逸也何以逸能任人也聖人勞  
於求賢逸於得士當有虞氏納于大麓遂陟帝位任四  
岳以主內事任十二牧以秉外政任大禹垂益伯夷夔  
龍以平水土以典禮樂以掌山澤以治百工故可凝蔬  
垂績而御遐迩當宁深拱而教化德與天道契乎淵  
默詩云不識不知順帝之則書云知人則哲能官人安



民則惠易曰垂衣裳而天下治其是之謂矣夫勤事者  
勞也勞者何益自任也聖人憂勤以圖治躬親以底績  
當夏后氏受帝之命又厥水土乘四載而導江河別九  
州而差貢賦任其桑土分其土宜聞啟之泣而不歸櫛  
風沐雨而無倦授元圭而告成功以散身而為律度故  
能功著萬世濟于生民詩云弗躬弗親庶民弗信又云  
小心翼翼其是之謂乎故聖賢之言舜也則稱其德曰  
無為而治者其舜乎又曰舜有五臣而天下治言舜則  
稱其功曰盡力乎溝洫又曰微禹之功吾其為魚矣蓋  
德者形而上者也功者形而下者也立德立功之道其  
殊久矣况禹受舜命而告厥成功乎

曾參不列四科論

登四科者十人而已德行顏淵閔子騫冉伯牛仲弓言  
語宰我子貢政事冉有季路文學子游子夏而曾參于  
孔門為達者也不預十哲之選其故何哉夫仲尼生周  
之末立定哀之間斯文中微不絕如綫乃以仁義之道  
行忠信之事攷其言行采其材智得是十子弟為四科以  
標儒雅之道其遠益至矣而參不列其間者念其道  
有所未至矣試嘗論之曰孔氏四科之選皆有賢哲之  
具體者哉非各言其一也言者百行之先闕一不可顏



閔非獨行德行遠也游夏非獨以文學舉也宰賜非獨以言語稱也冉季非獨以政事擇也蓋有五常之具德而後列其所尤至者哉故德行者豈無政事政事者豈無言語言語者豈無文學斯互舉所長之言也而曾子惟以孝行著聞不能具得能者之體但行其一端故所以不列於十哲者也若孟子所謂伯夷叔齊聖人之清者也言夷齊不食周粟采薇首陽蓋德聖人之一清德耳蹈道則未也由是觀之則參之事夫子學其道推其心但得聖人之一孝德耳言其材則未也或曰參也孝何以非賢哲夫十子者有四科之德豈無孝乎蓋孝在其

中矣三千之罪莫大於不孝仲尼之門英賢之選而薄於孝行聖人之心何以言哉或曰孝者百行之先居在四科之上夫孝養之道誠為至心然莫逾于德行故仲尼嘗曰孝哉閔子騫而居德行之科蓋孝者無以逾于德也是則有其德然後列在其間而參之孝一介之孝也賞尼嘗曰參也魯故為之說天子諸侯之孝以治邦國以及百姓以廣其志

開封府試三正循環宜用何論

先王應天祚敷正令歷象為貴因損為重故春秋之義正月居王之下示正朔自王者出也當帝道標季王化



資始夏商周之居代王寅丑子之正攸數夏后氏憂勤而治溝洫禪讓而陟帝位以大蔟為正蔟者湊也萬物湊也而生陽德之盛者也其色尚青其樂大夏祭禮尚氣牲用驪駒商放桀而取神器慚德而朝萬國以大呂為正助呂者陽宣氣盛德之中者也其色尚白其樂大護祭求諸陽時用日中周伐紂而王天下戎衣而威遠迓以黃鍾為正鍾者種也律呂施種而出盛德之初者也其色尚赤其樂大哉禮貴兼用牲取騂牲於戲商循于夏不敢居盛而處中周循于商不敢處中而履初故觀之正則其道可知也仲尼曰行夏之時又曰吾欲觀

夏道是故之杞而不足徵也吾得夏時焉蓋知夏之律歷四氣可以平分也三代之季秦以十月為正漢初因其弊而終革之太初已降率以夏正為定典夫陽生于子大人道長羣陰尚壯天地閉塞若政教立而未布文章施而未完陽慚于丑其氣欲勝宇宙凝沍庶物猶蟄若刑政孚而未達化育至而未成陽發于寅其道大振草木甲拆土膏脉起萬物喜其嘉會陰德伏其摧剝若道德之教未畢禮樂之文皆至易所謂聖人作而萬物覩之時也吁政有大小德有盛衰三王不可以共議三正不可以同道當循環而後知其政德也故史遷曰三



王之政如循環窮則反本國家革五代之弊繼隋唐之基謂湯政多慚周業孔武不足以標表仁義之他宜乎用夏道躋禹德所以同時令齊餘閏節春夏之和正厯候之始使告正朔于天下而民知其盛德焉君子曰邦有道雖商周之政可也邦無道用夏正將無補

### 曹參修職論

漢曹參自齊入相飲酒繼日惠帝讓之參謝曰陛下自察神武孰與高皇帝上曰朕安敢望先帝觀臣孰于蕭何上曰似不及也參曰陛下之言是也且皇帝與蕭何定天下具法令陛下垂拱參等守職遵而勿失不亦可

乎吁君之不逮在賢雋致之則堯舜可也已之不逮在道德進之則皋夔可也况世革秦弊時在守文創業之君則兵以詭勝事以時設有刑戮之威而無繩墨之制高皇帝承秦弊而起遠近響應數年之間平定四海暨繼世之君則當守仁義循法度制禮樂易章服撫內外明刑罰官賢材親宗族所以基太平而遵王道也傳所謂王者必世而後仁故文武之政周公制之成王襁褓而德及三代豈成王之德參于文武乎參上不能致君下不能自疆况治民乎君則限以高祖已則限以蕭何而不知古聖賢有殊功異代者矣謂天下定而不可復



危法令具而不可復易我不擾則天下靜我無事則天下定嗚呼三城長安役衆百萬簡易之道邪降灾雨血桃李冬花無為之應邪勿失之職復可在哉蓋參祖尚黃老飲酒不治憑託異說以致王室陵遲諸呂弄權寔參之自歎

獄市為寄論

夫先王獄已定刑市以聚物刑必正其狂直物必辯其良偽其來尚矣漢曹參起於獄吏執圭而候以將校之材迹黃老之弊政事之失必以寬晚歲罷齊相屬後相曰以獄市為寄慎勿擾焉相曰治無大于此乎參曰獄市

所以并用也今君擾之姦人安所容乎吁獄者鞠訊過罪笞掠參至姦吏市法出入生死良民受辱引罪自誣大獄一起寃者大半在乎察人情偽繩吏之深刻先王以明慎用刑而不留獄禮曰悉其聰明致其忠愛以盡之市者聚會民物貿遷有無貪賈縱欲翔貴時價儉民幸利雜良以苦在乎節馭儉於末民戒巧詐於貪夫先之以經制後之以教令周禮曰量度而成價質劑以結信王制曰姦色亂正色五穀不時不鬻於市周孔二君子制禮刊書罔不盡聖人之道絕姦宄之路故姬旦滅商紂誅管蔡不成康刑措四十餘年仲尼為中都宰市



無二價路不拾遺蓋成之以廉耻防之以仁義衣食足而民不爭刑罰舉而民不犯也而參以獄市之大并容不擾益德吏而殘人命惠姦而耗民財亂則可期治乎何有後相之語欲知大体參不能以正君臣尊王室審號令提綱紀之道語之反以亂政期為後患夫漢接秦弊化墳籍煨燼世無所聞而黃老之語在焉敬擇其善者從之亦可以少裨政事而參乃入不由戶反道亂常得非舊獄掾縱姦為豪暨處上位惡傷其徒憑托異說以惑於世邪悲夫

### 開東閣論

漢平津侯開東閣待賢當時諸儒亦有稱者近世以為有急士風風美其事者多矣而或不知其意焉夫侯起於徒步履歷顯位而指陳兩端以惑時議棄背宿約以阿上旨外無別材飾之以詐至於覆布被飯脫粟故買臣難其短汲默訐其偽自知無功以速官謗故設東閣假待賢之名以誘士大夫之譽夫待士者育其材觀其能採其謀而行之擇其賢而進之故平原下士得毛遂以安趙郭隗禮賓德樂毅而霸燕侯為相六年招待賢雋而史籍所載由其門出者卒無一人豈漢併六國而無賢乎當此之時匈奴寇邊諸侯構怨侯未始定一計



以安之豈多士而無謀乎夫開閣而不能待士待士而不能用與邱墟廡庫何異焉設使相天下者賢材在朝則進之在野則升之豈開閣而後為賢哉於戲嚴助董仲舒之徒賢人也候而陷之寧有進人之意邪蓋善為釣名任詐之術使後世美之惜哉

不教吏職論

漢薛宣不教子惠以吏職漢書備之矣且曰吏道以法令為師何可學也時人以為然夫國之大者君臣也家之大者父子也君臣正則國政行父子正則家道成君明而能教臣忠而能諫則國之正矣父慈而能訓子孝

而能爭則家之正矣石碯教子以義方仲尼

以詩

禮常賢授之以一經鄧萬專之以一藝後世稱之夫成童不就師傅父之罪也况父而不教乎蓋事莫大于學學而後能其事銷金石者不累日操曲本者不累月若教子以一經之書三尺之法則不止於職也夫吏職者民以寬猛吏以畏愛事以時變教以俗設府寺州縣郡國天下雖大小異器而其政一也何謂不可學哉夫生而不知之則周公仲尼其人也自茲以降未有不學而成者漢興則仲舒學春秋而建大議安國學尚書而為通材君明學易而知變雅圭學詩而從政故致斷無失宰割



有宜厥功哉焉宣謂不可學者蓋起於獄吏斗食之下  
暴厯顯位不習經義何以語人哉嗚呼吏事不能言况  
大道乎子不能教况生民乎故當宰天下之際官屬議  
其煩碎天子淺其儒術六年無補於政事宜其放棄焉

### 李德裕非進士論

唐文宗議貢舉曰子弟寒門但取寔藝宰相李德裕對  
曰臣無名第不合言進士之非其祖尚浮華不根藝寔  
朝廷顯官須公卿子弟自小便習舉業日熟朝廷間事  
臺閣儀範不教而自成寒士國不能習也夫治平之器  
曰政布政之具曰文宇文之基曰道行道之夫曰士士

之於政由左右手也故有國之典先夫取士雖沿革異  
軌而同歸求聘之蓋古者諸侯薦賢有三適之制射宮  
選士觀五善之節姬周受命文物命倫羣吏獻賢能之  
書登于天府樂正士造士之秀升於司馬進士之名立  
矣禮賢之道廣矣暨六國行玉帛之聘兩漢立四科之  
選魏晉或表薦而登士齊梁或版辟而起家故孝廉明  
經之科秀才茂才之舉限口限年之制射策待詔之選  
損益無常而察言觀德之規不妄設也李唐御統艱厥制  
度立進士之科正名也行辭賦之選從時也而天下  
之士誦詩書秉力筆秉仁義之道而進朝廷闢場屋詔



宗伯以方圓曲直而取名才大儒比比而有然詩賦之制非古也古者國風雅之謂詩不歌而頌之或賦暨三季移統七雄黷武大道既隱正音去矣故少卿五字以叙別鄒孟四言以述祖陸謝勵聲於晉宋任范治榮於齊梁詩之體失矣頌刺之義微焉若孫鄉暢幽惻之意屈宋起迂誕之說相如閎行以前尊揚雄淫麗而後殿賦之體墮矣規諷之音衰焉唐興文流愈甚前失執彫飾為規矩正麗偶為繩墨詩則協散而合律賦則限韻而拘字燦然清才而不復質矣譬諸栢梁永明體獨若秦漢之於唐虞也故德裕許其浮華則可矣至於言朝

廷顯官須公卿子弟斯言之玷無乃甚歟夫諸侯襲封功臣繼絕須子弟奉祭祀而爵及世也若其靡恃門閥之貴屈身士大夫之間講習仁義延揖時譽有緇衣之美成作述之志雖寒士之賢弗可加也若其高輕肥之飾馳逐豪俠之五以奢僭自大意氣相燦不知衣食之出而忘弓裘之業雖將相之世不可任也哀哉堂構之業多墜嗣興之賢甚寡若子弟不教而成則堯之丹朱舜之商均皆可居天下也况父母之聖非教不行也國之治非目不熟也臣之良非師保之無功也何教之而不成目熟而不知保傳而無補哉益上智不愚之不移



也故楊興說於史高母薦乳母子弟王吉疾其驕鶩請  
除任子之令則知子弟之才非專任之器也詩曰其父  
析薪其子不克負荷書曰世祿之家鮮克由禮况朝廷  
崇爵豐祿設官分職治亂之道不在它而在賢愚也子  
弟寒士賢治愚亂其一揆也然則子弟以嗣蔭而受祿  
士以歷世而頒爵歷試之下黜陟章明故士之不省者  
鮮矣至如傳說胥靡而興湯呂望屠釣王王周管仲商  
販而霸齊由余戎狄而強秦斯皆歷試諸難登將相之  
任誠不讓於子弟也故舜湯不用三公九卿之世而舉  
臯陶伊尹不任者遠矣易曰賁于丘園書曰野無遺賢

則豈謂子弟邪若以寒士窘急衣食不能熟習德業則  
仲舒下帷倪寬帶經乃子弟耶若以寒士社門閭巷不  
識闕朝義範則仲尼正魯國之雅頌叔孫定漢之儀制  
亦子弟耶夫志士之學也終日不食終夜不寢將負周  
孔之戈而春揚墨之喉以聖君之道左之生民之心右  
之誓銷瀉薄之器於太平之爐故遑遑然急行行道也  
雖九經之奧必獲仁義之旨載籍之廣必取禮樂之制  
前言往行燦燦在目立于朝無慚色無愧辭也書曰學  
古入官此之謂歟得士之道不得偉哉詩曰思皇多士  
生此王國於戲宰制天下伐天工也當改正朔易服色



制禮樂發號今草襲因損頤指而行何不合言之有苟  
以選舉之制雖失中道則以德進以事舉以言揚擇善  
而行斯可也苟謂辭賦非古則策以時務問以康濟非五  
經不得以對非常道不得以言則經緯之術宏達之材  
見矣而得裕以林甫餘烈陟位國相知簡賢附勢之旨  
無宰制補衮之德而場屋之下英傑間出縉紳之士勲  
名相望欲騁材術專國政不可得矣故將隳貢舉以  
杜賢路進子弟以崇私黨俾朝廷之人無能傑出已右  
故宣宗制曰委國壻於愛壻之手寵祕文於弱子之身  
泊參信書亦引親暱斯乃扼其咽喉而中其膏肓矣厥  
有朱崔之貶以謝天下宜哉

議

秦烏氏倮與朝請議

議曰王者賞不失功爵不墜典車服有等貴賤有別所以  
賢者知勸而禮不踰開也秦負戰霸之業竊乘帝王之  
器下良民而右富商棄禮文而圖貨殖烏氏倮以繒綵  
私遺戎王谷量牛馬今此封君而與朝請吁非三公九  
卿之世無平邊富人之策徒以交市夷狄畜聚蕃育起  
於商賈之下而五侯伯始無一命之重而參朝謁名器  
兩失禮義交喪古者位以制賢祿以疇庸論道經邦以



被公衮積行累功以致候服今茲澆漓淫而不典儒學之道罔敵貨賄之力將相之世靡及并兼之家雖天子親傳組綬躬給廩食位不足以勸賢材矣古者朝以辨等覲以頒制玉帛修贄而後會等威有序而後見今用非辟彝倫喪敗銀王之貴而肩豢牧之夫明堂之下而朝畜產之主雖闕定日定冠冕歲制與服禮不足以別貴賤矣使耕隴之民游手商賈哀奇珍之貨使匈奴之人修六擾之業競刀錐之利滯貨以要君止累鏹而駕公族翕然風從以競末作是則稼政不修蒔器不楫栖畝之粮不暇獲吐絲之蠶不及飼卒有凶札之變兵革

之急萬民罄罄金玉不以餬口六軍凍凍牛馬不以挾  
續雖欲復農不可得也於戲惟名與器不可假人賞罰自失沮勸則差故禮賜君子小人尚不同日蓋慎之也守國之器禮之為大去禮而行何以享國宜慎守之哉

### 唐免宗人役議

議曰復徭役者地則兵火凋殘水旱沴疫行幸所經戶籍新復人則鄉有善行家無兼丁者預焉斯有國之者典法也李唐氏受命之二載詔天下宗人無徭役吁李氏之姓百陽之後周距隋季且千餘祀姓族滋漫率十三四焉既高祖乘隋室之幣北起晉陽西圖函夏百姓



烏合肺附成大業者非獨李氏也何黨之甚歟書曰一人有慶兆民賴之又曰元后作民父母是則天下之親皆親也天下之姓皆姓也若諸侯陪臣因王父之字以為氏則天下之民以君為氏明矣而不姓之者不可一也三皇之世則三皇之民也紂之民世則五帝之姓也堯之民比屋可封非獨祁氏也紂之民比屋可誅非獨子姓也禮曰不獨親其親不獨子其子書曰無黨無偏王道平平傳曰君子不患寡而患不均斯為之義何以處之前所謂兵火而免者蘇其業也水旱無免者濟其艱也行幸而免者疇其費也新復而免者寬其作也有善行而免者勵修德也無蕪丁而免者俾養勸也至於同姓而免者餘不知其所利焉則天下豪猾之民將棄已氏而即李姓濶耕廣種而幸成其私行之不已則天下之姓三分而二冒於李矣



欽定四庫全書

歐文莊集卷二十一

宋夏竦撰

重修潤州丹陽縣門樓記

縣門樓建鼓之所也號令之發始乎鍾鼓興居之期啓  
閉之節由是乎達故其墉歸如其樓軒如冠廳事旁屋  
狀人之有冠冕若之何毀之今年夏初予視厥職憫夫  
斯樓積有年所墻敗於左木隳其右風雨所陵埃壙所  
侵官而弗省其誰治之乃役工百餘指伐木十餘本易  
其數梁替其數楹蓋其墉諸其欄取其壯而不取其宏



務其完而不務其華後負練塘前壓驛道山阜表其東  
津梁續其右望之敞然有官府之風登之廓然有小天  
下之心使吾民如樓之完善政如樓之新則百之之間  
可以無瘡痍矣後之為政者可不免之哉

賜杭州靈隱山景德靈隱寺常住田記

會稽之西部吳郡之東境山之美者武林在焉晉咸和  
初常有梵僧歛其峻極以為鷲峯別嶺飛至茲地由是  
依山起殺名曰靈隱蓋言靈山之隱於此也竒迹既彰  
歷世增葺燎垣危磴叢楹鉤檻樓觀之華勢勝之美首  
於餘杭善巧啓導之師若登炬以相續精勤憤排之士

譬雲務而畢臻世有人焉其來尚矣國家同文區夏洎  
殷葱雪五天飛錫四海浮盃訪道而來解裝相繼天聖  
之間有衆七百每結趺聚飯應器如雲俱羅之施難充  
維糜之化靡及爰有上首始儀墾田廼獻像於東闕請  
播種於南畝我尊號皇太后恩心外護心守大慈授諸  
佛之記言布群生之勝利威光所照物成金色慧力之  
感地見寶嚴若夫平決萬幾將明百志動遵法度慎守  
典彛以為道釋名田禁於創置國之舊制豈敢廢焉然  
五保育嗣皇紹隆景業素依佛寶享祐帝躬冀其萬壽  
無疆百祥由錫在諸服玩予何愛焉乃賜直百萬市田



二十五畝以施之歲輸舊賦天下之為公也永充淨供  
福田之無極也彼給孤施園非續命之要妙意設食無  
宿飽之資若此因緣則為殊深乘天時以稼獲絕水火  
之虞治防庸以蓄泄靡旱潦之患地種盡黑而可窮此  
功德無窮恒沙皆寶而可盡此布施無盡諸菩薩僧觀  
是田者應合釋迦如來以信心為種以精進耘耰因田  
以悟法諸大比丘受是食者應念香積如來以甘露為  
味以大悲普熏因食而證道然而悟無所悟者正悟也  
證無所證者真證也無離塵垢以染於淨無求寂默以  
住於無三界不見於身心萬法本忘於封境舉足所之  
皆是道場適意而居莫非宴坐夫如是者始可以享斯  
田施消此萬香報兩官之慈恩續諸佛之慧命也哉臣  
幸預譚場叨觀秘藏遐推往記切孝茲山龍仁出世千  
載而神僧建寺七百載而聖人世田由是知山川龍象  
抑有民數以待聖神乎奉命昭紀刻彼靈區皇太后右  
序嗣君崇修妙果施夫疆畝教天下之至慈也皇帝尊  
事母儀布宣聖愛勒於金石教天下之至孝也率土之  
濱含生之品一切見聞得不踴躍於茲辰哉時天聖四  
年歲次析水仲夏望日謹記



慈孝寺成朝廷命史官頌故實將昭銘於金石永垂耀  
於文象聖上穆清之暇熏被以觀且曰先帝天猷太后  
聖德備在茲矣非天下之妙翰孰為奇麗之觀非朕躬  
之親筆罔罄寅威之禮由是上自題額命翰林學士綬  
書文百工相趨萬區載躍以為極帝王之能事敦恭愛  
之大本英華聖域焜耀國經巍巍乎亘千古而不朽者  
也皇太后歎嘉睿志濬發慈旨申命史氏識諸碑陰臣  
聞聖人因親嚴以教民放能感天地本文治以化下故  
能締風俗然則召至和之應成惟幾之務垂世烈而潤  
皇業者必繇斯道洪惟上聖天縱多能厥初啓朱藩殘

震邱典學時敏博志大成及乎集丕統迪詒謀益復研  
精書林垂思藝圃探七經之奧蹟鑿百王之治亂非仁  
義不圖於政非禮樂不訪於朝而師臣勸講之餘碩儒  
儒進讀之暇寶附在御畫漏移刻秦峯之篆頡篇之  
楷例之妙拂素之工出自生知動超神品嘗以為開元  
以降御題碑榜標桐栢以尊道揭麗正以崇儒未足以  
移雅俗之風恢至要之體故是寺之建也飛白崇真之  
額所以奉先猷攄永慕昭定陵之遺烈以繼文而教天  
下也玉篆慈銘之首所以宣懿鑠闡慈訓尊長樂之美  
業以愛親而訓四海也昔羲書八卦以啓人文禹錫九



疇以贊皇極參之聖功偕為盛矣若乃翔翬結宇液金  
填畫虬龍於螭首潤雲露於翠珉映調御之相光陰  
詞臣之妙墨奎躔婉其鈎曲珠斗煥乎闡干固將太一  
下觀百靈潛衛為億祀君臣之法昭兩官孝愛之德也  
哉臣忝貳近樞荐拜嘉詔抑欽累盛之懿彌負重之之  
怯唯頌次典則勒諸左右云天聖六年八月朔日勒記

青州州學後記

國家制天下肇有十八路京東首焉西起甸服東漸淮  
海南畧洙泗北際河濮閔防之要控制之重城圍之大  
室居之盛青復首焉建隆距明道繼政四十有二皆嚴

廟勳舊臺閣材彥方重鎮俗嚴明馭下信孚惠洽吏端  
刑清潤金石藹謠誦固亦多矣若恢教化之原崇學校  
之美惟丞相太原公有焉天聖七載公委遠時柄來牧  
故鄉以平章庶務之心斟酌元化之手裁量一郡豐功  
懿蹟不容談矣其最為薦紳所稱道者以公頃奉鄉書  
偕郡計冠多士長百工洎偃息作藩雍容立政事必敦  
本仁不遺舊忠也欲報朝廷而不已德也將流里閭而  
不竭於是出私俸起官學天子賜圖籍掾屬制田素三  
齊懷筆千里擔登鼓篋於朝佔畢於夕數學在焉若夫  
明大道之本觀三千之奧將欲佐人主庇生民經緯天



地制作禮樂刻百代之弊定一王之法者可以為文文  
矣騁六藝之精練當時之務將欲對清閒之問廣漏刻  
之聽高議雲臺以決安危約史金匱以定褒貶者可以  
謂之學矣博貫百氏並授立業將欲藻潤謨訓勸講帷  
幄主文以陳諫道託寓以達下情箴規庶官粉澤時政  
者可以謂之材矣記問之師句讀之學飭小辦事空言  
誚譟相高篆刻自嘉白首弗底於道盈編無益於世者  
丞相取之予亦取之東秦與區全齊盛府俗漸鄒魯之  
教人多海岱之靈朝家好文輔臣善誘而不能寶寸陰  
刻數志扶多教訓孝悌建希世之策敷及物之德彼維

師賜履於周平津始封於漢果何人哉游於斯者無自  
局焉建學後三載東土荐饑予猥奉使指謬踵前良且  
以疇昔政司倍貳台鼎敢勒輿頌以永德音詩云君子  
能長育人材傳云得天下英才而教育之茲學之謂歟

堂皇之建職次之設皆備前記此不復書時景祐元年

正月朔日記

海鴈橋記

頃歲山東旱蝗予被詔教寧下穆陵並濰水出萊陽輟  
黃腫野無蔬茹市無血管有客饋海雁六弗忍為膳育  
於青州之柳亭亡其一後數予予內徙睢陽輦五雁縱



之南湖一夕舊客過都知之撫掌橋側五雁悲鳴飛集  
圍繞膝下至暮戀戀不能觀者為之出涕斯禽受人之  
恩不過稻梁養育歲時耳尚數年而不志其主前史  
有妾質事君高軒列鼎而不能盡心於王室者殊可嗟  
焉國風美閨睢之不淫嘉鳴鳩之均一盖有資於王化  
也因題是橋為海雁橋以旌之時景祐三年十月日記

青州龍興寺重修中佛殿記

左海瀕右岱賦沂蒙巨其南濟徑其北闕壤廣衍惟青  
州焉唐以盧水平地置平盧軍其城縈帶山岳控引川  
瀆氣候高爽風物林盛雅俗雜處修葺四達富焉庶

焉東夏之都會也中有佛圖實曰龍興寺舊以為田文  
之第地勢斗絕堀坳洋之之陰樓觀飛注翺翔重圍之  
表東踐絕澗征度於闐闐西瞰羣峰旁屬乎原野十二  
之聖畫於茲焉寺中有殿宋元嘉二年建甲子十周棟  
宇隳圯常坐比丘畫樞化青人得鏹三百萬以新之又  
錮以石階繚以髹檻後增二亭左以陰鋸識右以歲鼓  
格世傳孟嘗飯客以鼓為節其格存焉載祀寔久木石  
剝脫但上畫飛仙殆非當時器而寺僧寶之以傳疑焉  
或曰弗何為者邪夫太始既分皇衢既遠舜禹揖遜湯  
武于戈自撲而雕自淳而漓姦穴鋒起智詐火馳是以



天生聖人於叔世分三教以救之九州之載人性淑均  
道德可以化焉禮樂可以教焉故商武丁時生老聃於  
瀨鄉周靈王時生仲尼於昌平流沙之外西戎耶叙非  
威神攝受權實開遮莫能變獷悍勝殘害故昭王時生  
佛於毗嵐然今古之論罔不折衷於仲尼昔夫子自謂  
則曰文既沒文在在茲乎於老氏則曰其猶龍邪於佛  
則曰西方之人有聖者焉以是論之則釋老皆聖人  
之救世者也夫子不之譏焉或曰樞之新是殿有功德  
邪夫天地者煩惱之燬宅也世界者生死之業流也人  
之生也與愛俱生怵快乎名利蓋纏者生死之業流也  
馳走乎烈煌龜沉魚躍出沒乎驚波翳元明而不知甘  
衆苦而不恨忮忌而得者謂之能放肆而前者謂之達  
其生也與夢寐等其死也與糞壤俱聖人哀之故為之  
御三乘之輪艤六度之航以接癡冥以拯昏溺後之登  
是殿者若睹相好以攝心歎寶嚴而起信固可以遠謝  
塵垢坐空妄幻若瞻白毫之光悟見精之不動聽寶鐸  
之音覺聞性之常寂因可以返照真際旋復本初證菩  
提心成無上道由是觀之則樞之於茲殿有無量功德  
矣予嘗守茲境目樞之勤聊紀勝因以刊石時景祐四  
年八月朔日記



杭州寶雲寺記

寶雲寺者吳越忠懿王所建千光王寺也西方之教東流震旦盛衰由於祇叔輕重繫於震歷五代紛競諸夏陸梁妙音阻而不通法器垂而將墜惟錢氏之守浙水也稟天王之正朔受如來之教戒是時吳楚間國號為有道諸侯帶江負海列郡十三數世百年干戈不試益以為得大雄法力故竭寶玉崇塔廟具香華鳴鍾鼓以事之嘗有里人張仁昭者誦薄伽梵姥陀羅尼積有年所感名殊祥攝衢州刺史翁成起聞之欲旌其事乃請於王以乾隆戊辰歲春二月創是寺於錢塘門之西建

千光王像因以名之其制則臺門前闢紺殿中左高樓東建鴻鍾屢發紫臺西時龍藏常轉旁儼像設後引堂構經齋方丈溫室雲厨四百其楹再潤而畢面白傳之湖負武林之岫石則鵲巢遺阜左則星隕派客石怒欲飛松怪如折梵殼飄海外香雲蔭空際清吹時落纖塵不飛乃朝貴遊心之境蒼生祈福之所始請睦州九峯山僧環省升法堂談妙義未幾而終復請衢州鎮境寺積善禪師義澄登寶座語真空於始為盛是二師者皆學於郡永明寺道潛禪師悟諸夢幻泡影無有言語文字以心傳心深入圓頓故其門聽法者朝夕如市焉洵



我國家受命之十八年王倣歸朝奉圖獻地皇明所及  
佛日重光雍熙二年寺僧有因請真命於闕下太宗皇  
帝詔以金額賜之草偽號也中貴人藍敏正世之勤佛  
事也時法鼓重鳴金姿再構讚唄鍾磬盛於往初洎淳  
化改號之明年積善大師西向石脇而滅其徒義隆傳  
衣受法俄亦圓寂懿夫禪源未涸達士挺生於是義澄  
法師屈知寺住師神彩高擴藏識圓明慈悲以導衆生  
自諒以接朝士禪誦之暇務以莊嚴為意故咸平三祀  
迺日庀工階砌殿堂悉增前制化清虛於妙樂擬莊麗  
於祇洹為南國之名區作西郊之極觀有大善知識作

是言曰善哉寺之興也有五善焉張仁照之感應翁成  
起之信重忠懿王之崇建僧有因之請命藍敏正之書  
法法之行也有三達焉九峯之證入積善之辯慧義隆  
之傳授足以表名山之昭感示皇覺之遺休若夫攝五  
善之心證三達法景行精進十四年於茲者則有法證  
公焉浙江東西其名尚矣固可書諸金石垂於不朽者  
也其素肄典墳專談仁義未窮觀於八藏難了悟於三  
宗奉運使兵部尚書郎江夏王公世長之命不敢固辭  
但記其興置年月傳授次第而已若叙頓漸之宗開權  
實之義破諸有相以至無生蓋有格言請俟能者



台州延慶院記

臨海濟靈江而西越萬步至括蒼山與真隱山並間有  
垂流千仞漱石成淵蛟龍宅之而雲雨攸生歲有驕陽  
亢極並禱羣望寂寥無證則邦守守臣帥寮屬而榮之  
薦牲沉玉以請常有雲油然發乎湫中暝山暨川雷震  
風動不崇朝而兩足予佐郡再祀而兩徃既享既禱絕  
澗而返至於山麓坦然右平頽之則有浮屠氏之宮在  
焉道出於側因憩其所視其榜曰延慶院問其僧曰全  
議考其興替索其傳記則梁天監初始建為龍山寺至  
唐會昌五年而廢未暮復興開平中刺史駱延訓親篆  
榜而改之為龍潭院唐祚不永錢氏據有浙水忠懿王  
俶始領此郡復新其額為戲龍院皆以迹龍淵而得名  
也國家受命帝宣教象我宗文廣武儀天尊道寶應章  
感聖明仁孝皇帝告成功之歲有詔賜今額焉問其授  
受則遠者不能詳矣詰其近則乾任中有僧常一始旁  
鑿靈阜全葺棟宇次傳慶仁道進雲泰雲興今遂至於  
全議凡七世矣其殿宇廊廡多全議糾檀施所就也觀  
其巘嶂巖齒溪流沕滴古木怪石偃蹇盤踞雲物萬狀  
融冶凝結疏篁茂草挺擢蔓衍高下嚮背宛為靈區嘉  
遜之室不築講學之館未綿竺乾氏方牆華屋即而有



之於戲威哉麗哉既盛且麗控引勝絕田方之中豈獨  
於此予閱掌印事政不專出無明誠以感造化無至仁  
以名和氣雨不時至下專出無明誠以感造化無至仁  
總於是舍須雨而旋噫豈人至靈而弗神於龍彼裸壇  
於齋者獨何人哉豈修已行義之有所未至乎當以日  
繼月而誠吾志屬寺僧全議固請作記因并書而授之  
俾勒於石使後之識者觀斯文知不徒然而作也

台州天慶觀三官堂記

台之郡治東出百步且此抵山有古宮室舊傳茅盈駕  
鶴上仙始建為白鶴觀既廢至唐<sup>明</sup>白王興之築天寶之

臺於庭書以開元之榜唐命既革棟宇將朽洎天福五  
載永嘉威儀葉後已之門人太原大師黃永乾惠然來  
君始議興葺兄五十祀乃傳門人張日損太和冲融恫  
幅無華黃老之教擇其正而後學藥石赴人之急不避  
風雨時議以為長者上即位者十二載勅本郡以禮遣  
至門辭疾不起由是遠民始知日損有高尚之節會國  
家降禪於社首有詔改賜觀額為護國由是遠民始知  
朝廷有清靜之治乃有石港來後寺獻直三十萬請新  
三官之堂以列塑像以廣焚修既就予往觀之而不知  
其何神日損曰道家之說太虛之上虛皇在焉分命元



卿治於紫微鄴都清冷之官而三元按籍考察天下有  
猾黠詭異竒忍暴謾險詖隱慝僭妄欺偽者可殺可奪  
可負可賤有信厚仁惠恭遜和易謹愿端方孝弟正介  
者可安可壽可富可貴故上天有命宥宥無殺疏而不  
漏如合符契者三官之職也噫吾嘗讀聖人言有云死  
生有命富貴在天又云皇天無親惟德是輔故常疑造  
化中有主邪其自然邪果如日損言則三官其為主者  
乎夫位有尚真職司造化能使天下杜者直安者安暴  
者天仁者壽貧者損廉者益雖畫祀梓之材為之宮備  
山龍之草為之服罄玉帛之禮為之薦日記而辰享可  
矣非謂無名之土木也予結髮讀書弱冠為吏未嘗為  
惡惡亦不及從今以往益致於善以聽陰騭以驗三官  
之說



文莊集卷二十二

序

宋夏竦撰

重校妙法蓮華經序

三世諸佛為衆生出現證無所證得無所得者一大士而已妙萬化而無象應羣有而難名不著世間猶如蓮華故竺乾大士集靈鷲遺言曰薩達磨奔茶利迦魏梵僧支強梁接譯於交趾初成六卷翻薩達磨為妙法奔茶利迦為蓮華是名法華三昧晉煥煌僧竺法護譯為十卷名正法華分二十七品後秦鳩摩羅什益普門一



品譯為七卷名妙法蓮華隨崛那笈多益藥草喻品之  
半以提婆達多品八塔品名添品法華唐道宣律師叙  
云三經文旨互陳時所崇尚皆用秦本自漢至唐六百  
餘祀受持盛者無出此經五代以還諸侯僭據字音句  
讀方言多誤國家混一寰海聖上尊用三教余家世奉  
佛乃取世傳諸本及化外舊經釋文摘句數自參較又  
以悉曇梵夾傍行右讀中原傳譯始創卷軸討論重複  
卷舒繁數因觀近世圖籍鏤刻摹印綴黏成冊差便於  
古由是命工倣則肇製此經庶幾學者易為究覽此經  
序品至勸發十餘萬言貫穿諸宗融通萬法或伽陀歌  
起或祇夜應頌文有廣略以接三根機有深淺以醅衆  
請喪實際者為之譬寶藏執湮槃者為之指鬻珠淪世  
苦者為之諭污宅樂小法者為之演化城開甘露之門  
以來衆軌均大雲之澤以偏羣生大方無隅則有地墨  
劫歷之談至神無方則有眉毫舌相之變會權實之戲  
論設頓漸之假名使三獸渡河並臻其量五愆憑軌各  
應其緣諷誦可以殖福田解說可以標慧炬大慈方便  
其在茲乎至哉清淨靈覺廓大虛而含法界光明寶藏消  
幻想以契真如境既對忘心將安寄見有迷悟體無去  
來妙本圓常超然獨立資始萬行孰除其方若乃解脫



為蓋纏以照覺為封累掩室摩竭杜口毗耶名言道斷  
思惟路絕則神而明之在乎其人然而能趣百善者信  
也善度象苦者解也信解之初必由緣感皦月不能現  
空器膏雨不能生槁木後學菩薩幸精進而求諸時皇  
祐三年夏四月乾元節日謹序

楞嚴經序

夫善言佛者惟性而已矣混成不測况之道乎無方善  
應况之神乎湛寂精常圓滿平等迎之不見其首隨之  
不見其後生生而不生化化而不化包裹萬有含吐十  
方資始象緣具足萬行光明密照而非色靈通潛運而

非空世界變遷而不移山岳旋偃而常靜現前而惑者  
不辨日用而迷者不知易曰寂然不動感而遂通老氏  
曰獨立而不改用行而不殆其性之謂歟無始劫來一  
切衆生攀緣外境忘失本心分為四纏疊為五濁馳而  
為妄想結而為昏翳聚而為煩惱流而為生死累我真  
源枉入諸趣如來哀之此楞嚴之所以作也以衆生苦於  
奔逸故為之行三觀滯於色相故為之指八還誤認塵  
根故為之辯六入妄計因緣故為之談七大至於屈伸  
金臂縮疊華巾極善功之喻拂微細之感令瞻寶光者  
知見精之不搖聽鐘音者悟聞性之常在若乃本明旋



復靜慧發生御最上之寶乘游無邊之性海顧色身若  
微塵視太虛如雲點彼無始輪轉之根億劫顛倒之見  
我人妄執壽命浮想若熾炭之燎鴻毛烈日之晞朝露  
不待思惟已自消釋大哉菩提妙圓本始清淨既無妄  
幻翳於真精豈有身心受彼生死水澄滓去漏盡法除  
萬行不脩而自圓六通不求而自澄預於此者非至神  
乎然而經撮八藏之精要窮萬化之根源譯之者務  
簡潤之者尚辭或使潭研泥於句讀故有僧可度為之  
箋分詳畧有叙華梵兼該迨歲再周能事方畢後之觀  
者應當返夢想之緣氣遺心目之習因了識精之元還  
獨妙之本雲駛月運既息於諸旋木盡灰飛亦忘於幻  
法秋毫不立真理自冥彼求諸佛無漏勝解者幸精進  
於斯焉時景祐四年二月朔日序

桂籍追榮序

樞密相國太原公次子故衛尉寺丞某字慶之幼而辯  
悟不樂戲玩始就冰傳卓如成人屬詠景物動會辭律  
洎勝衣趨拜風度彌遠客卿沉敏若懷將相之器褚陶  
清談付得墳典之娛志慕老莊譽等終賈嘗恥田官蔭  
刻志緝素曾未卅歲文藻粲然金籟之言發於鄒魯玉  
樹之秀茂於庭階咸以為天資美才性識早立沐浴聖



化被服詩禮固將騰天路摩絳霄超野絕羣一日千里  
御屏隔坐紹亮隲之榮緇衣改為宣桓武之德於戲天  
道云遠大化難諶育而不苗聞者增歆上閱其幼慧贈  
襪有加追賜進士及第以成其志有詩賦雜文二十卷  
題曰桂籍追榮集所以紀漏泉之澤昭夙成之美死而  
不朽其在茲乎時大中祥符六年十二月日具銜某序

宰相部威重篇序

傳曰有威可畏謂之威又曰君子不重則不威况夫應  
槐鼎之象處巖廊之尊萬民具瞻四國為憲固宜資性  
端重容貌抵肅履有常度居無惰容憚服遠夷得真相  
之體表率羣后有大臣之風所以享高明之寵總裁成  
之業致遠任重而克濟焉

將帥部議論篇序

夫好謀而成名臣所以建議無文不遠君子所以尚辭  
降自漢代率勤遠略間有仁賢之將克敷詩禮之規洞  
察蠻夷之情精通軍陣之要或圖上於方略或欽承於  
訪問辨安危之本明勝負之端碩畫是陳遠圖斯亮用  
能克濟大難式集茂勳垂厥令猷蓋可祭也

將帥部強明篇序

易曰自強不息書曰明作哲蓋強者臨機而有斷明者



遭事而不惑况夫折衝邊圉濯征寇戎軍政貴平事機尚速故有負英果之略懷擿發之材周知敵情詳見疑謬俾姦偽之黨畏其聰明貌虎之師伏其雄毅克貞師律用集茂勲者焉

將帥部受命忘家序

傳曰將受命之日則忘其家臨軍約束則忘其親蓋軍旅之事安危攸繫將帥之任社稷是毗固當以孝而資忠以義而割愛受詔引道初無辨嚴憂國忘身靡顧私室聳英烈之風際為忠義之模楷宜乎錫以土宇紀之旂常者哉

將帥部不和篇序

傳曰師克在和不在衆又曰安民和衆蓋軍旅之尚和也久矣夫師出以律順成為臧固當輯睦兵戎克濟勲略其有處營衛之任握旗鼓之要受脤偕出授袍並行忘從帥之義恣兼人之勇專送其欲不相為謀或大呼於和門或盛氣於幕府至有乖異籌畫違沮期會反干戈而鬪奪鼓吹以往棄公家之事為仇方之利暨平覆軍奪爵而不悔焉孟子云天時不如地利地利不如人和誠哉是言也夫

閏位部知子篇序



夫知子莫若父知臣莫若君蓋父子之間否臧易辯齟  
齟之際性習已彰若能鑒其誠明遺其外飾闡其好弄  
之意觀以成人之風自邇祭遐材將焉遁况夫負英武  
之略應偏閏之位固宜念家國之重審裔嗣之能建為  
元良付大業而不墜授之事任被讒謗以無疑書諸簡  
編亦王者之懿德也

邦計部貪汙篇序

詩云貪人敗類傳云貪以敗官為墨蓋貪而不敗者未  
始有也夫小人縱欲棄義貪冒榮侈心甚邱壑莫之盈  
饜語利於市猶為不可况夫寵以車服委之官司總筦

權之任舉飛漕之職內度經費外調與賦詎能避白圭  
之玷全素絲之潔唯以取捨由已奢僭是圖雲下以刑  
傾衆以勢侵盜於國誅求於民聚斂積實不知紀極以  
至苞直盈門簠簋不飾惟罪罟伏歐刀而不悔焉於戲  
子罕云吾以不貪為寶誠君子之格言哉

學校部讎嫉篇序

仲尼沒而微言絕七十子喪而大義乖周室道微漢承  
秦弊春秋為五詩分為四肇名家之學樹同門之黨自  
茲厥後異端蜂起奚獨師授之不一固亦克伐而相勝  
其有肆章句之業背和裕之德已之失必緣飾以為當



彼之是必倚撫以為誤庠序之間權詐騰涌講習之際  
譏訛紛錯務在擯斥動成仇怨或忿爭於朝廷或遷謗  
於祖裔位上者擠陷於罪畧旅進者潛肆於圖害語云  
道不同不相為謀其是之謂哉

御監部邪佞篇序

易著閑邪之言傳垂遠佞之戒况夫職象河海任重股  
肱固宜采其聰明好是正直若乃阿諛靡媿巧令是圖  
菟匿庸回廢忠斂信行媚以希於上音獻賂以悅於適  
臣增宮禁之素規亂禮樂之舊物用速官謗或煩刑書  
於戲先王之所以難任人者其以是夫

總錄部讒佞篇序

有虞之命則曰聖讒說先聖之戒則曰遠佞人蓋邪偽  
可以惑聰明浸潤可以間忠信淳素既隱巧詖滋萌義  
以利遷政由寵放故有行媚於內善諛於朝脂韋其性  
以悅於上貝錦其辭以譖於下愛同疾異害正忌能挾  
蕪芥之嫌緣疑似之隙媒蘖其短文致厥辜采苓之刺  
以興投杼之疑斯起交亂家國離間君臣職為屬階無  
已太甚故君子之惡利口國家之難任人其有旨哉

總錄部傲慢篇序

夫傲以取禍往事之明規慢以失官前言之深戒自東周



不競禮度寔微驕倨之俗興而遜悌之風缺仲尼垂  
叩脛之戒穆叔箸倍賦之文自是以還風流不泯或恃  
才而陵長或盛氣以傲人忽禮容而不修茂年爵而罔  
顧至其箕踞而傾倚岸幘以嘯詠跌宕適意豪縱亂常  
招負俗之累嬰自貽之戚於戲書云簡而無傲詩云彼  
交匪傲萬福來求誠為君子之道哉

文莊集卷二十三

賦

河清賦

宋 夏竦 撰

有客謂臣曰朝廷將祀汾南為民祈穀大河載清於陝  
之服子嘗聞其說而頌其異乎臣曰傳遽之吏罕聆朝  
議願客摠抱劇談開我以嘉瑞客曰唯唯蓋聞滔滔靈  
源發自崑崙導於積石出於龍門懷砥柱而勢迴播鉅  
鹿而派分三五先之於祭四瀆宗以為尊千里兮一曲  
濁流兮渾渾乘春則桃花競湧赴下則竹箭爭奔若澄



清而變色實千祀而疇德為中夏之經瀆故其應有常  
通上天之絳河故其靈不測洎我國家秉皇圖宣帝力  
尊百神朝萬國光明乎遐絕馨香乎霄極禪云亭而廣  
厚玉簡既封祀汾睢而頌祗鸞旂未飭西人清候而望  
幸六官戒期而勵翼爰薦祉而炳靈灑澄波之湜湜徒  
觀其祥風蕩漾非烟蒙幕浮休氣於川上汎榮光於岸  
側失洶湧之黃流湛清冷之素液銀潢之影橫秋帝臺  
之漿映日江練初靜壺冰乍釋鑑秋毫及鐵塵露金沙  
與銀礫神魚龍馬泳深淵而不隱紫闕珠宮擴洪流而  
可觀合濟瀆兮安辨委滄溟兮競碧吉獨自等於明水  
嘉號宜尊於清滌可以頌於廟式告元符贊於史以永  
大謨豈比夫蘭葉朱文涓黃靈之籙芝泥玉柙汎帝媽  
之圖登夏子之魏魏掩漢唐之區區子盍獻議外廷上  
封公車請以水而紀官以瑞而建元然後登歌而率舞  
豈非士大夫之職乎臣日客知其一未知其二上之功  
不可以方策載上之道不可以金石紀感通靡間於洪  
纖周流罔滯於形器六合而萬區肅穆而昌熾元符而  
景命紛綸而沸渭天地清而陰陽既序邊鄙清而干戈  
不試政教清而無遠弗懷刑罰清而有生成遂道德為  
休而神靈坐贊仁義為祥而富壽攸暨禮樂為符而上



下昭假賢材為瑞而中外允治喬岳未分則三篇降汾  
祀將禱則真文至旁無琅而高無際充乎天而溢乎地  
蓋盛德與大業也夫豈河清而已矣客於是色沮魂悸  
逡巡而退

景靈宮雙頭牡丹賦

應制  
并序

國家升禪之五祀聖祖上靈高道九天司命保生天尊  
大帝降禁中之延恩殿真宗文明武定章聖元孝皇帝  
躬款颺旒祇若靈訓璿源長發真蔭克開建景靈之宮  
以置祠宮構天興之殿以尊肖像獻而不裸唐太微之  
儀水以節觀周辟雍之制回廊四注雙渠交屬植之美

木間以幽石叢薄互映蘿蔓相縈固列仙之幽館實有  
帝之下都也先皇厭代颺駕上賓聖文睿武仁明孝德  
皇帝應元崇德仁壽慈聖皇太后哀極孝思禮尊昭事  
乃建奉真之殿於天興之左備嚴像設對越威神憲曲

察之規模兼顧成之法度其右則皇帝肅明福之館其  
後則太后啟鴻祐之廷並為齋居恪奉時享普觀六藝  
眇覲百王尊祖奉先莫大於此是宜靈鑒博臨嘉生誕  
降至顯盛德覺悟蒸黎者哉天聖四年歲次析木甘澍  
充浹大和豐融惟時季春吉日丙午羽人動色宮更告  
祥有牡丹之芳叢折雙跗而共幹樞臣謹職以承獻兩



闈傳視而嗟異爰命國素臨寫英莛仍詔調臣昭紀嘉  
貺上意以為先聖奉真祖之禮至虔真祖眷先帝之意  
尤顯是彰美應發為奇芳臣竊考舊聞仰迪陰騭天意  
若曰太后以至慈保右嗣聖皇帝以至孝恭順母儀總  
決萬幾大康兆庶真祖降鑒先聖在天樂茲重熙錫以  
嘉瑞二花並發者兩宮修德同膺福祉之象也雙枝合  
幹者兩宮共治永安宗社之符也昔棣萼承華召公流  
詠芝莖連葉漢帝登歌竊比茲芳豈容並日仰應宸旨  
謹為賦曰 維五行之嘉秀鍾百卉以流形伊牡丹之  
淑豔實造化之鴻英雜五色以交麗間千葉以敷榮結  
紫心而函實散黃蕊以傳馨幹扶疏而四擢枝綽約以  
相承久潛芳於藥錄肆闕載於幽經首春華而擅美冠  
花品以騰名何分叢於帝圃遂得地於殊庭蔭琪珠之  
璀璨藉瑤草之葱青潤五雲之滋液對六羽之威靈吐  
雙葩而並發效神貺以潛呈紅紛敷而接萼翠香裊  
以聯莖較襖織而不異等高下以無傾若霞裳之對舉  
類鳳羽之偕升表兩宮之睿聖共一德以隆興寔詒  
謀之燕翼固道蔭之章明願書芳於信史永傳美於千  
齡

正家而天下定賦

以家道居正平  
定天下為韻



夫王者刑於國自於家苟家人之居正則天下之無邪  
男女有宜序君臣而甚邇威嚴罔懈制刑政以非賒原  
夫九聖徵言六虛元造巽離之象攸設家國之文可考  
內惟陰正式符順以之規外則剛中克叶威如之道蓋  
其以威為本者患愛之不孚以愛為本者患威之無餘  
思愛育之不黷在威稜而自居恭謹見嗃嗃之儀故有  
孚於居極侮慢有嘻嘻之象蓋失節於慎初故聖人治  
家之威刑國之政始親親於九族終明明於百姓恭已  
則人敢不恭正家則國罔不正則在乎聰明御下端謹  
存誠言必信而無妄行有常以惟貞陰禮可觀既閨門  
之肅睦聖功惟叙則區宇之和平故能親賢才效邪佞  
國之正則家之正家之正則國之定防閑不失信君令  
以臣行教化無遺見姑慈而婦聽是則德及荒服恩覃  
溥天四海為家而肅肅萬民如子以平平二女有儀乃  
虞舜政行之始寡妻可法為文王教令之先是知正於  
外者先正其中治於衆者先治於寡差於近則失於遠  
正於上則平於下今上審安危慎取捨家道成於親戚  
國政行於夷夏易所謂王假有家交相愛也

政猶水火賦

夫濟水者火濟猛者寬苟水火之功罔弗則寬猛之政



堪觀善治不得以常舒舒則民慢事不得以常急急則  
民殘故君子施之以寬糾之以猛式齊離坎之象自合  
陰陽之境謂晦之至兮將闇必繼之以明動之極兮則  
勞必濟之以靜是故上善是將炎德其相愛畏之宜迭  
用文武之道交光九德用宣始湯湯而游至有刑以正  
俄烈烈以方揚故能成良吏之功立明王之制或溫潤  
以和協或疆明而正厲德均烹能傳齊美於和羹道合  
剛柔易同功於既濟然則建皇極合中庸若慘舒之更  
用類律呂之相從刑久則殘故賞於春夏賞頌則弊故  
刑以秋冬是知物不終衰有時而盛道不終利有時而  
病在乎酌炎上以求治參積陰而發政羣生不匱如符  
菽粟之資萬事適中奚取韋弦之性蓋以水濟水分其  
德哀以猛濟猛分其政危猛因寬而不暴水因火而無  
虧故法網明明孰見蹈而死者政經悶悶誰敢狎而玩  
之我國家宅元功播鴻造流睿澤於潤下發恩光於就  
燥儒有服子產之言願佐太平之道

藏水賦

以冰感之日藏  
以昭禮為韻

大寒陰凝國乃藏冰法上天之歷象遵百代之規繩鑿  
諸窮谷之間清聲競發納彼凌陰之內素彩交騰當其  
冬氣殘寒風勁溪壑霜皎川池雪映天子於是度時令



齊國政詠卒章於七月知邠國之風觀列職於凌人見  
周官之盛乃睠有司謹而行之將不遺於國用冀無爽  
於天時納自輿人委截肪之瑞彩閉之冰室積靈玉之  
寒姿蓋以氣肇微和候殘嚴律念積陰之潛伏懼盛陽  
之侵軼乃鑿彼凝沍藏其凜慄紅輪引耀遵北陸於斯  
辰黑柁惟馨享司寒於是日莫不陽威振發陰德潛藏  
禮雖遵於往古事疑出於非常取不失時斬我我之素  
質用之以道結凜凜之寒光吾乃觀其所因知其所以  
致苦雨之不降亦驚雷之周起獻羔而啟既不解於東  
風治鑑而成又何歸於舊水美夫元功可駭至德孔昭  
不失膳羞之味且無霜雹之妖詩謂春開享祖宗於清  
廟禮聞下逮頒祿位於公朝我皇上以典故臨人以文  
明繼體修時政以施令藏堅冰以示禮故時無愆伏之  
災而道光乎祖禰

穆天子宴王母於瑤池賦

以喜逢仙色開  
宴真境為韻

穆天子以八駿西巡賓於上真宴瑤池之勝境當甲子  
之良辰人問之別館離宮如遺弊庭月際之珠璫玉珮  
自是嘉賓當其碧落凝寒餘霞斂色升繡轂於層路會  
魚軒於西極天顏半掩旗翻日月之光鳳髻遙分扇側  
鸞皇之翼俄而翠華潛駐彩袂相逢瓊瑤之吉地邀



桃李之姝容修城而美錦千兩供帳而輕綃萬重廣樂  
嘉成徧舞霓裳之曲流霞互舉爭傳馬璫之鍾是何雲  
雨馳魂笙篁飾喜倦斂霞袂慵僿玉几想臺榭於三島  
憶峭函於萬里鸞駢鶴馭顧天仗以歸歟玉慘花愁念  
芳時之已矣天子乃端冕無言愁臨象筵晚文桂而歎  
喟持玉笋以遷延乃歌曰黃金闕兮紅玉泉停鸞輅兮  
逢列仙別可惜兮阻流年愁玉露兮摧渚蓮王母於是  
低鬟掩面慵闕錦薦盼龍衣以淒涼叩金盤而婉孌乃  
歌曰琉璃屏兮芙蓉殿接君王兮侍歡宴心不留兮思  
字懸念秋風兮隔絃扇是何樂極悲來烟鎖霧開移暉  
而鴻飛洛浦迴眸而雨散陽臺日照龍旂逐驂駒而東  
下雲藏雉扇隨青鳥以西迴已而悵望空餘音塵漸水  
蘂宮有意以延想函夏無因而西幸春水白兮瑤草芳  
黯離愁於絕境

吹律暖寒谷賦

以陽氣中暖寒  
谷和暢為韻

懿彼鳴律中含威陽激清音於極北暖寒谷於窮荒導  
太和之恩成其地利發重陰之窟被以天光鄒衍以幽  
谷至深平臯可貴思疆理於曠土冀生成於品彙徧吹  
六琯乍迴天地之心澄運五音大合慘舒之氣是何清  
聲激越雅韻冲融足以齊六氣和八風歌太簇之聲句



芒發外奏黃鐘之氣和粹積中已而遺響未終朝陽乍  
滿却陰涸以冰釋召天倪而風暖具簫韶之響嘹唳鳳  
鳴非孔壁之音鏘洋玉管是何元功既著至理罔奸律  
因陽而煦暖谷以陰而涸寒正累黍之儀既無失度感  
好生之德足以勝殘豈不以惟北者陰極陰者谷因推  
律以條暢故生物而孕育當脉起之際變鴻鹵於開田  
觀甲旂之時享膏腴於百穀是知律資大一聲感中和  
發萌芽之蠢蠢散冰雪之峩峩律本相生自契佶倫之  
伎軍聲不斃無漸師曠之歌是知民不干常化猶其上  
念涼德之可革在仁風之潛暢故聲為律兮感蒼生克

符天賦

白雲起封中賦

以至德符通白雲祥呈為韻

漢孝武尊百神朝萬國觀素雲之嘉瑞見東封之盛德  
英英初起騰玉檢之晴光皎皎漸升帶金泥之曉色當  
其大樂從律靈旗逗風登天孫以讓德禪梁甫以歸功  
至理旁達精神逐通上帝之命克彰監於君所泰山之  
雲不散出彼封中爾其蒼蔚朝濟氤氳載白俄失素於  
霄露將奪鮮於夜魄貫五色之土輝映銀繩透三脊之  
茅光連玉冊徒觀其輪困乍起皎潔斯至既異赤鳥之  
色應同白鶴之名紛玉葉之浮光低離印璽動蒼梧之



素影漸過染盛蓋其神造匪謀元功罔闕德有感而必  
屆應無遠而弗至當登封之禮上達於天而雲物之祥  
下發於地足以表陰陽合乾符不羣山以遐布不五采  
以相踰騰瑞玉之佳色映靈壇之四隅待族以分傍亭  
亭而鬱律崇朝而散臨繹繹以芬敷是知白者潔之祥  
雲者和之瑞紀於官而天造昭假歌於詩而德音廣被  
足令八九之主慚降禪之功三五之君媿升中之義於時  
百辟所視明姿聿分天子凝旒既享其嘉既太史  
乘牘且紀其祥雲有處士大夫之職者賦盛事於斯文

陶侃夢飛入天門賦

陶太尉之未達也孤藐貪悴折腰下吏竒蹇未脫於常  
數文武不可以自器於時方隅騷動天下恐悚帝將付  
晉以大統錫我以佳夢是何天命宥密感通陰騰曜靈  
薄暮星芒駢坐營魂愒恍於中夜羽化不知其何術莫  
不煙昏霧迷雨驟風疾羽翮為吾而馳張心膽為吾而  
曠逸崛起地表翰飛太虛目不暇而自闕心不暇而自  
圖若飛龍駕雲而脫泥塗大鵬乘風而疾夫衢勢何可  
止雄莫之當月輪掩映而閃爍明河沸涓而蒼茫不知  
其夢之為夢也踐道遙之塗屆恍惚之場但謂其飛之  
為飛也翔垓圯之墟窮汗漫之荒曾莫知其適從但磅



礪而翺翔忽長空之豁開覩天門而在傍吾謂是天也  
駕元精乘灑氣去無不至吾謂是門也排氤氲鼓洪濛  
去無不通迅羽而載揚突雙扉之八重闕鍵縱橫以離  
立開闕岌業以穹崇莫不宵露珠落殘霞墮紅織女投  
梭而錯暘織阿失轡而怔忡天左旋而且右斗西建而  
遽東若長鯨之透禹門而燒尾於春雷龍梭之化屋壁  
而鼓鬣於狂風徒觀夫逞雄飛恣心曲吸沆瀣以滿其  
志舞星辰以快其欲女媧仰視而顛仆盤古傍觀而拭  
目方將以造化之氣為流而刷其毛羽以混元之窟為  
巢而棲其爪足何其四方熒熒大明東生餘樂熙而未  
已殘夢倏其如驚羽翰雖復於手足魂魄猶翔於杳冥  
曾虛寔之不辨何有無之足馮謂其實也變化之力飛  
揚之迹則不可得謂其虛也騫騰所自耳目所記又何  
如此蓋靈符之先朕天命之不秘俾我材為大國之器  
道為萬世之利功若舉而無所不至命若飛而無所不  
遂故范逵有吹噓之象張夔有羽翼之備然則總斧鉞之  
任受師旅之寄三軍負羽於左右奇兵翼張於要地  
實若周尚父有鷹揚之號漢將軍有飛將之勢則知自  
地升天者起家居三公之位天門八重者元戎董八州  
之事豈必若簡子神遇帝享之以鈞天之樂繆公夢迴



天錫之以鷄首之次也哉

草木為人形以助戰賦以草木殊別有成師徒為韻

壽陽之後兮草木流形陰功化成似代及瓜之戍如屯  
細柳之營孚甲可觀肅前茅之銳氣成行不亂陳右偽  
之疑兵當其天挫疆鄰神資晉境軍容始耀於高敵木  
竇潛分於峻嶺衆和可驗盡傾葵藿之心師老無虞未  
是桑榆之影由是威加敵國勢壯皇都麗地之形莫辨  
被堅之象何殊不齋三月之糧寧無菜色縱之五兵之  
器應有柔弧觀其疏旆寒巖洗兵多露累弦而葛蔓爭  
引秉節而松心益固光侵斧鉞應迷謝氏之蘭影接旌

旗不認將軍之樹懿夫草昧之初天開壯圖闢峇巒於  
壁壘變枝葉於車徒欲成橫草之功何須破竹自整如  
林之旅不待飛芻已而甲拆岡陵風生林藪雖因形以  
賦象亦從無而責有苟宣尼之見美不讓芻靈縱蘇代  
之深譏何慚木偶故得塵清肥水席卷秦師逐北而蓬  
飛曉日解嚴而柏悅朝曦色似忘憂之類怒銷蠲忿之  
枝慶賜雖行不受分茅之賞勤歸莫覩誰歌杖杜之詩  
蓋其德順人心威乘天討黎元分君子之林猿臂假王  
孫之草故能敗苻堅百萬之軍都如電掃

狗盜狐白裘裘賦以心計所成知得歸國為韻



智士多機羣心莫知念狐裘之可致非狗盜以難期竊  
粹白之珍寧宜鼠首雜重原缺疑當其禁衛方嚴珍竒  
莫得爰馮齊客之計庶買秦姬之力掖垣徒峻雖崇百  
雉之高宮藏非深必遂千金之飾俄而猶豫心決狐趨  
計成越虎門而潛伏映麟殿以宵征悄過獬豸之庭無  
慙狗態默傍後狎之柱敢作豺聲已而內府潛通天閣  
不阻閭啟扃鐻徧搜囊褚疑羔袖之難辨喜豹祛之我  
與鼠偷既遂乍懷輕暖之資狼顧何忙便出深嚴之所  
是知四衛非謹千門豈深既得閭欺之便詎聞夜吠之  
音漸下螭階覺忘蹄而有意猶憎柱影知顧兔以無心

蓋其志在忘身誠思報德潛開篋笥之固果竊蒙茸之  
色明眸素齒既私狐貉之衣輕蓋軺軒遂脫虎狼之國  
故得鷹揚前席危從東歸犬馬之勞既立貔貅之勇皆  
微闕吏難留不媿雞鳴之智秦謀既失曾無虎視之威  
則知小道不遺殊功遂濟翻因守禦之類特作穿窬之  
計故先王嚴管籥謹宮闈懼有慢藏之弊

放宮人賦

以宮闕幽閉曉  
然情愜為韻

隋失民望唐開帝功降鳳詔於丹陛出娥眉於六宮夜  
雨木迴儼鬢雲於簾戶秋風漸老失釵驚於房櫳當其  
鳳歷頻移重門久閉蟻聚螭首唯違彩袂步金蓮而共



嘆無偶對鴛瓦而徒傷夫儷花冠不整籠黃髮以全疎  
柳帶低垂映蜂腰而更細太宗於是矜絕態軫深情舊  
苑而何傷幽閉新恩而盡放輕盈莫不喜極如夢心搖  
若驚踟躕而玉趾無力盼眇而橫波漸傾鸞鑑重開已  
有歸鴻之勢鳳笙將罷皆為別鶴之聲於時銀箭初殘  
瓊宮乍曉星眸爭別於天伏蓮臉競辭於庭沼行分而  
掖路深沉步緩而迴廊繚繞嫦娥偷藥幾年而不出蟾  
宮遼鶴辭家一旦而却歸華表苟非帝德從儉皇情燭  
幽又焉得離永巷別長秋指燕趙之歸路望荆吳之故  
州算迴程而靨帶新喜思往事而眉含舊愁羅衣而颭  
灑輕雲競歸巫峽寶髻而屈盤嬌鳳爭下秦樓或繡鞦  
香車蘭舟桂楫指故里以思動涉長途而意慙飛騰自  
適既疑齊女之蟬夢幻堪驚且悞莊周之蝶已而別館  
淒爾離宮寂然動蘭燭於殘照藹薰籠於夕烟蕭條而  
竹換筠粉零落而苔侵翠鈿天上和風送神仙之二八  
人間麗日迎桃李之三千美夫入昏主之宮出明君之  
闕千門而綺煥裳錦九禁而雲銷鬢髮故宜其貝齒朱  
唇歌太平之日月

鑄金為范蠡賦

以賢臣去國鑄  
金成狀為韻

鑄以表德金惟象賢始規模之卓爾俄冠冕以昭然任



銅墨之資焉能接武縱銀黃之貴未敢差肩昔范蠡以  
勁卒平吳扁舟去國勾踐重念成功乃嘉丕績兼金非  
貴將酬霸越之功良冶大開遂展鑄顏之力俄而威儀  
可象鎔範斯陳西南之美寶方集卿相之英姿乍振敵  
國以亡似避鑠金之口洪鑪委質翻從作礪之臣是何  
爍彼真姿宛成竒狀對烏喙之英主映稽山之遠嶂威  
儀可仰似當麟趾之時軒陛非遙如履燕臺之上蓋以  
辭賞逃名嘉猷大成聳干官之耳目見三品之精英儼  
端委之儀不慚銅臭處薦紳之列獨有金聲道契陶鎔  
功符鼓鑄交光而鵲印垂組晃色而金盞擎露倘滿管  
之可貴自契韋賢苟一諾之非輕何慚季布是知剛以  
表義義以象金觀巧冶之非遠察常念兮則深我武載  
揚既示能剛之力大名難掩足彰為義之心美夫佐命  
爰來成功而去閱形容而國寶堪仰讀史第而嘉名益  
著始知文種之後曾無遠慮



文莊集卷二十四

頌

景德五頌序

景德紀號也五頌美盛德形容之有五也王道興而頌聲作士大夫之職也臣文淺辭陋職卑任遠不能盡得朝廷盛事發為詠歌但少叙萬分之一式抒區區若以國家成功告於神明薦之清廟臣工之上無媿辭焉謹昧死序進如左

平邊頌并序



臣聞四裔交侵薦食邊境為日久矣虞夏有山戎獯鬻  
之患成周有昆夷獫狁之難趙築長城以設險秦驅諸  
戎而出塞逮漢而下種類滋蕃和之以親而不庭懷之  
以文而不至要之以盟而無信餌之以貨而無厭疆臣  
以是發憤王者於焉赫怒至有空天下以事外夷奪耒  
耜而授干盾四海將服而中原隨弊英主所以疚心良  
士所以極慮故漢武震威而損費光武惜費而損威李  
牧知保塞而不議其久奉春約和親而不議其叛賈誼  
陳五餌而不議其貪晁錯論三技而不議其獷班固述  
懷禦而不議其疆侯應計屯戍而不議其守誠哉嚴尤

所謂無上策者也魏晉已降羌戎猾亂或結以姻婭抗  
之鋒鏑謀者鮮而闕者衆偏議多而勝算寡其閱羈禦  
之制無復可從且代表衰亂眺梁邊陲上天有融騰我聖  
祖䟽鑿山河重造日月東臣九夷南庭有蚩武功文德  
二帝相繼蠢爾戎羯首鼠西北討之則後服赦之則先  
叛數十年間兵用未戢我皇帝天地其德日月其明風  
雨其教雷霆其威陰陽其功造化其智無窮兵之忿無  
和親之弱無飛芻輦穀之勞無迎降畜附之費廟謀動  
於自然成算出於無際戎治請命羌豪獻誓北至西歸  
願備蕃衛臣有世之所叛亂服曠代之所獷戾臣下不



知其畧億兆不知其功巍巍乎蕩蕩乎我皇帝之有天  
下也得禦戎之止策神而化之聖德無名臣謹按春秋  
僖公四年經書楚屈完來盟於師盟於召陵曷為再言  
盟仲尼喜服夷秋夫服一荆楚聖人喜之况我平三邊  
降二敵者哉臣再拜喜抃謹獻頌曰

帝宋經營戎車四征東南易王西北難庭遷寇河隴戎  
整幽并我澤流春我威飛霆去如鳥獸驅若蚊蝱國既  
仄定塞猶棲兵吾皇柔克順帝之靈元造不測聖功無  
形戎后款塞羌種乞盟稟我正朔受  
矛偃重英投烽揄塞執黍戎亭六合無雲纖塵不驚日

月所列皆被皇明環海為池倚天為城恢恢聖謀洋洋  
頌聲有皇上帝惟德是成莫直愛匪國我國既寧莫患匪  
邊我邊既平欽哉欽哉永萬千齡

廣文頌并序

景德二年夏六月頒勸學詔於天下秋九月甲寅詔張  
六科取士廣文德而勵儒業也臣聞聖人仰觀乎天俯  
察乎地知文之可以經上下締邦國正禮樂移風俗於  
是乎修經籍為文之器立庠序為文之館植正化之本  
導仁義之源跬步之間失之則亂故先王謹教勸學博  
文訓士以取輔相以濟功業其道充者其文盛其政息



者其章缺蓋文者匠天下之器也四代而降文物之制  
莫茂於漢莫茂於唐自昔周道不融青衿起刺七雄分競  
干戈日尋道堙楊墨辭逸談說斯文中否則而漢氏  
開之洎三國鼎峙六朝南渡義駸僊釋辭放輕麗吾道將  
微而唐氏隆之然則漢乘秦弊去聖猶近學欲博而益  
專文欲華而自質其取士也故有賢良有道孝茂之舉  
唐革隋命去聖踰遠學欲一而滋蔓文欲典而更麗其  
取士也故有進士科目明經之選夫漢之得人莫盛於  
策問唐之取材莫精於辭賦雖文質殊軌而取捨齊致  
公卿之材忠謹之臣論議之官博古之士考之二史世

不乏人故制度可遵歷祚皆永暨五代宿兵漢唐之制  
廢缺垂盡天啟有宋拯我儒德曾不崇朝文明天下我  
皇帝親幹文柄指麾萬國變為政教發為號令景德之  
間坐致太平蠻夷柔服天下歸心邊城夜開五穀被野  
由是益重儒術專用文章增漢之科式求典則勸唐之  
學以博文辭傳曰周監於二代郁郁乎文哉雖使漢文  
武兩帝唐太明二宗生於今日覩陛下好文之德將震  
駭而不暇豈敢自量其輕重哉臣叨預薦紳竊聞公議  
皆願復三朝之禮定封禪之制告文德之成功終薦神  
之厚意其瞻聖德不勝區區謹昧死上廣文頌其辭云



星辰日月麗我天則山川卉木賁我坤德禮樂詩書經  
我邦國三儀同文羣生茂殖故我皇帝道以文麗吐擢  
象天含章法地典故周旋朝廷之制儒雅雍容卿相之  
位既和三靈既庭四方乃監虞夏式規漢唐高張六科  
制詔萬邦敦勸儒學親策賢良景德之感斯文有慶勵  
我多士遂及百姓巷隘褒衣塗歌雅詠學館漸海儒宮  
越境天下文明洋洋頌聲方策鱗萃禮樂教興翰墨如  
雲環佩盈庭濟濟多士吾皇以寧多士寧矣納忠獻議  
封禪未行三雍尚廢願及盛時超行古制帝曰俞哉寔  
朕之意

朝陵頌并序

景德四年春二月皇帝朝陵于鞏書禮也古者因山為  
陵秦始皇寢漢氏因而制其禮以晦望伏臘四時上食  
歲正月天子率公卿百官諸侯王以朝廣孝德而盡思  
慕也三代既往漢代文明專以儒臣表正邦憲千歲之  
下垂為舊章自非萬國底定天子仁孝則不克行之能  
行其禮者必有大功茂德格於上下靈澤慶賜流於有  
姓鴻徽盛事紀於史策聲詩雅頌播於絃歌足使昭感  
上穹光被海外動植所生無不茂育人跡所到無不臣  
服蓋孝之為德也際天地而感萬物者也我崇文廣武



聖明仁孝皇帝陛下聖性純孝加於億兆郊祀燔瘞以  
祇事天地春秋蒸嘗以昭奉寢廟俎豆犧牲躬自執獻  
盡誠極孝冠於往初景德中天下無事夷狄內附塵清  
九圍通驛萬里吾皇帝親丕丕之基念祖考之業履霜  
露以悽愴感春雨而怵惕孝思之心不捨晨夕乃登用  
漢典制誥有司庀庫輅簡環衛幸鞏洛朝陵寢崇牲牲  
之禮備韶武之樂六官畢從四夷陪位錫鑿珎珎震響  
郊圻梯航寶玉駿奔川陸自古廟會祭享之盛朱之有  
也足以冠虞舜之德光炎漢之典昭假鬼神炳煥方策  
升聞於天則日月星辰雪霜風雨無有不時降感于地

則山川江河昆蟲草木無有失所大哉孝德之盛也不  
可得而名之遠郡小臣以文受祿無以自效謹獻頌曰  
皇帝丕顯孝治四國乃祖有功乃祖有德功業且溥惟  
帝太祖虔劉巨盜建邦啟土德昭且融惟帝太宗表正  
大中進賢保庸兩朝厭世龍歸波逝葬我弓劍因山鞏  
地春日熙熙惟皇孝思乃朝陵寢于洛之畿左盡縣何天  
旂旒歲蕤諸侯扈蹕珎玉參差和鑿鏘鏘行道遲遲瞻  
望松柏帝心傷悲亦既至止苾芬孝享吉蠲犧象馨香  
鬱鬯動止心企音容日想祖考來格款我追養樂以迎  
來哀以送徃命我考嗣受天靈貺河洛之濱太和氤氳



慶澤流春皇風感人翠華旋歸車服振振宋雖舊邦景  
命惟新孝德不匱永錫下民下民親親萬物皆醇歌頌  
騰文竹帛流芬孝哉皇哉子子孫孫

廣農頌并序

景德三年春正月庚戌詔頒農田勅於天下二月癸未  
詔郡國領勸農事崇化源而廣農業也臣聞聖人無土  
不王無民不君有土地則王業興有人民則君道立故  
先王之建國也土欲廣而不用隙民欲衆而不用惰謂  
地之不闢非吾土也人之不農非吾民也乃為閭里室  
家以蕃其生為畝澮封畛以理其田為耒耜鋤耨以庀

其器為歷象氣候以授其時立經制以御之設官司以  
教之均工商衡虞之稅正車馬甲兵之賦於是乎仁義  
禮樂有所加賞罰號令有所用三代通制建中經遠民  
以里居地以井受暨秦開阡陌農戰相乘漢制名田井  
蕪不息舊章缺而仁政墜經界慢而訟競起沿革而下  
古之制度不可復矣其政何哉蓋三季已還五代而上  
有天下者或不不知天下以地為基以農為本以食為  
源以教為器當其撥平禍亂經始四國則衽金革簡車  
馬計懷柔議聚斂賞勲舊治城邑暨邊陲既寧寓縣既  
平功業既成府庫既盈則思悉華夏以自奉驅億兆以



從欲有患邊幅未濶威武未震則轉芻粟事夷狄有患  
歲月易逝容髮易朽則招方士求神僊有患登覽未遠  
行樂未極則增臺榭麗宮室有患嬪御未廣歌舞未工  
則漁聲色選伎藝有患校獵未快馳騁未捷則廣苑囿  
具畢弋有患巡幸未偏游賞未普則修馳道飛清蹕其  
間自非負天啟神授之資有聖文靈武之德者則不能  
訓稼穡務儲時捨派而趨源去末而從本致天下太康  
家給人足者我我國家荷二聖基業用三王禮樂足食  
訓農克立治本吾皇龍飛春秋昂盛勵精百度旁求黎  
獻謂守文艱如創業承平難如治亂深鑒前世專行王  
道羈縻四夷而重兵革漁獵賢雋而藏網罟觀六藝之虛  
臺館聽道德定聖樂功業之大則成康文景無或比隆  
河山之遠則秦漢隋唐不能齊盛菽麥流行而紅腐玉  
帛充牣而露積陛下尚宸居戒麗御膳輟聲宵衣紫庭  
清問多士舉三王之故實修八世之墜典以為擇循吏  
守郡國撫有姓善則善矣而未專也於是授之使領設  
為職司所以循名而責實也頒憲令經田疇勸耕殖至  
則至矣而未一也於是編其制度勒為科條所以建中  
而示法也循名責實則官不曠建中示法則民不疑詔  
下之日鬼神稱慶太平之風旋踵可待不終日而爭訟



息未踰時而淳鹵闢九圍之內一歲之間衣食足而倉  
廩實仁義行而刑罰措大哉炎宋功德陛下教化垂億  
萬世與天無窮臣生逢聖明叨觀盛事謹昧死上廣農  
頌其辭曰

皇哉惟聖躬提天柄億兆歸心三靈洽慶廣我由事肇  
修稼政乃置官名乃頒號令號令維何分條建規恩斯  
懋斯流冗攸歸官名維何啟職庀司訓之道之播種惟  
時民曰勤止服田力穡晝爾于耕宵爾無斁千耦偕飛  
百穀咸殖既藝浮鹵越涇封洫官曰泣止糾力勸能瘳  
我錢鑄疏我溝塍巧能灌溉爰相卬陵汗菜以闢游惰

用懲赫赫聖謀有作咸觀畎澮四溟并疆九土沃野萬  
里縱橫其畝擁耒成林灑流降雨陽春如膏原隰如鱗  
我稼既華六合生雲稻粱黍稷萬井龍文同我婦于或  
耨或耘八月其穫乃登爾稼滯穗棲原餘糧壓野盈溢  
京庾流衍方夏式歌且謠土金同價有姪足矣君孰不  
足三有之困九年之畜八蜡既通五禮咸穆藏財於民  
所寶惟穀君哉君哉樂事訓農炎帝之教后稷之功方  
我王度明而未融臣之頌之永矣無窮

周伯星頌并序

景德三年夏四月周伯星見書瑞應也臣聞日月星辰



天之經也國之紀也日以象君月以象臣星以象民矣  
炎君德不傾不側仁義文武昭於上禮樂刑政臨於下  
得至陽之體於是乎有日瑞昭昭臣道不僭不忒忠信  
方正積於內訐謨獻替發于外得至陰之體於是乎有  
月瑞君之靈如日之升臣之英如月之征照臨下土六  
合文明賞罰不濫兵革不試災沴不害災沴不作生民  
熙熙家給戶足鑿井而飲耕田而食蒙帝之力生育蓄  
息於是乎上發於天厥有星瑞書云庶民惟星又云天  
聰明自我民聰明蓋星瑞之謂也國家受天成命五十  
年開法令寬大元元仁厚自克殄并土戎衣不再年穀

荐登俊又旅進我崇文廣武聖明仁孝皇帝陛下度輦  
神器稽用故實光昭百度緝熙禮樂刑賞以御中外慈  
儉以率左右羣臣有羔羊之潔公族懷麟趾之信郡國  
州縣各揚其職景德中匈奴謹守要約不敢犯邊塞無  
宿兵人用休息齊民之家不憂歲時食飫雞豚衣厚繒  
纊耕有餘器廩有滯穀扶老攜幼塗歌里詠大哉此時  
上無失德下無遺政君君臣臣萬國交慶雖日瑞于晝  
月瑞於夜曾不足表吾皇之明朝廷之盛於是乎有周  
伯之象告生民之瑞見於首夏國家大德之應也嚶於  
角亢人君壽考之象也天意若曰令陛下壽考萬年平



章百姓隆火德之光明昭上帝之休命願陛下欽之念  
之雖休勿休不數年間圖書寶玉雪霜風雨山川草木  
盡為嘉瑞史不絕書故曰陽感天不終日蓋天之於陛  
下猶父子之事也臣叨列縉紳仰觀靈祉知在今日斯  
文有光謹再拜上周伯星頌曰

帝宋三聖功成治定昭融景命承天慶兮周伯煇煇經  
宵耀雲何德之純感星辰兮吾君恭讓德音敷暢蓋天  
重象介景貺兮我國文明儒風炳靈惟德降禎發鴻英  
兮東南委照蒼龍隱曜徘徊天表光帝道兮考彼典章  
知我天子享嘉瑞兮上可紀官下可建元法象星躔假  
於天兮昭我炎宋永御星統微臣作頌歌日用兮

大中祥符頌

崇文廣武聖明仁孝皇帝陛下即位之十二年春正月  
乙丑大中祥符三篇降于左承天門書瑞應也以日者  
謹天命也以地者大靈貺也臣聞庖犧氏作結繩而治  
天將有命易以書契龍馬負圖出於河聖人觀之退而  
畫八卦兩儀四象吉凶悔吝無所遁其形矣百官以治  
萬民以察後世帝王言大政者自庖犧氏始夏后氏作  
絲墜洪水天將有命奠厥山川神龜負書出於洛聖人  
獲之退而叙九疇五行八政休咎威福無所隱其奧矣



彞倫攸叙水土俾乂後世帝王言大功者自夏后氏始  
炎宋氏作三聖致治天將有命昭厥中庸神人奉符降  
於汴聖人受之退而啟三篇清靜簡易道德刑政無所  
藏其秘矣四夷率服億兆可封後嗣帝王言大中者自  
我皇帝始大哉三氏之德與天齊盛皆獲符書益垂典  
訓混而言之則同參而言之則異同者事也異者道也  
伏羲以文物未作朝章汩亂天授以圖始啟其政夏后  
以水災未乂下民昏墊天授以書始啟其功炎朱以太  
平方至帝道有融天授以符爰建其中是則政也功也  
中也同為至道考其異則中也可以兼於政功矣圖也  
書也符也同為嘉瑞考其異則符也可以冠於圖書矣  
河也洛也汴也同為靈川考其異則汴也可以加於河  
洛矣犧也禹也宋也同為上聖考其異則宋也可以跨  
於犧夏矣故八卦之始畫也其象隱晦仲尼讚之乃著  
於經九疇之始類也其文章昧箕子行之乃列於典我  
大中三篇其則不然宛有章句政教出焉天作之天述  
之授我皇帝以七六籍以錫明命為萬世法故天不敢  
畀龍馬授神龜負於河薦於洛乃命使者奉而降汴魏  
闕之下禁門之上示天之恭我皇家且異於古也使仲  
尼復生箕子不死在於今日舞之蹈之猶且不服詎敢



讚之於經而行之於典者哉於戲千祀之衰也天道何  
遠乎一朝之盛也天道何邇乎蓋我國家揆五代之亂  
奄有神器太祖靈武經始於前太宗文明光被於後廷  
四海龍言萬靈阜吳越蜀列廣屠并不二十年寓縣穆滑  
授聖三葉以致太平今上居以天體化以神聲陰陽有  
愆伏而聖功無闕日月有盈昃而皇明不息故強敵北  
面而受封羌豪泥首而內附罷河西之戍放榆關之馬  
京洛之間王氣聚為宮闕良邦不試嘉穀穡生於田野  
齟齬舞詠於道路耆壽沐浴於膏澤桴鼓在庭而罷擊  
桃李垂路而不攀阡陌服車馬閭閻享梁肉當是時天  
雖欲秘圖籙愛符命其可得乎然則符瑞之至以五行  
而言皆有象也臣以列為三章者陽數也封黃帛者中  
色也時以春者仁也降承天門者承天嘉號也門聽政  
之象也天意若曰王者體陽德御中道行至仁則有圖  
書之瑞應之以承天之祐而聽萬國之政也臣幼學史  
氏講春秋大義以為東周不競瑞不當至先聖削而不  
書退有鳳鳥河圖之嘆繫自獲麟距國初建隆歷二百  
有四甲子矣賢材代謝而符命不至臣也何幸逢時遇  
主行年二十有四而四觀不世之瑞上比聖賢自慶多  
矣故身在滄海之上心馳象魏之下恨無文辭以廣稱



述謹昧死望闕再拜頌曰  
惟聖有功功格於天日月星辰炳其靈焉惟聖有道道  
格於地山川草木耀其祥矣炎宋氏作三聖永平休功  
無形至道無名莫高匪天莫厚匪地不足炳其靈不足  
耀其禎三正有神同開奧秘取圖河洛載文五緯爰作  
受命王者之瑞景德之盛奉之而至先斯吉日神告有  
密僊服降庭奔精照室蒼龍在申太簇歌春素月哉魄  
朱曦始晨皇帝受之於承天門宿衛咸觀玉帛駿奔爰  
有大夫進牘而言臣知天意敢告於君億兆歡心宗朝  
遐福有感於帝化為寶錄文武流光禮樂騰芬上達於

天化為寶文表我皇家大中建國表我天子大中立極  
三篇未至中道以崇三篇既至中德益隆建元青灾華  
裔可封慶賜周旋圜圜虛空一之日薦於寢廟昭穆增  
耀二之日告於朝廷雅頌騰聲三之日達於九土里巷  
賡歌鳥獸率舞四之日聞於八荒投戈右袵九譯來王  
可以象功制禮修樂三五之事一旦而作可以告成登  
封降禪八九之功一朝而見史氏書之藏於太室垂厥  
子孫遐觀茂寔太師歌之傳於樂府薦厥岱郊永告嘉  
祐素王聖哲見歎河圖臣之庸昧獲觀祥符歌詠功德  
職士大夫稽首獻頌願繼典謨



文莊集卷二十五

銘

穎州蓮華漏銘

宋 夏竦 撰

夫迎日推策帝鴻之憲天也治厯明時成湯之應人也  
日月有發斂盡夜有增減非在璿不能測盈縮非運儀  
不能定昏明以是厯數起焉漏刻生焉晝參乎晷景夜  
驗乎次舍雖上天之運不能逃矣舜史日永星火者晝  
漏多也日短星昴者晝漏少也周官有以火爨鼎之制  
齊詩有折柳樊圃之譏由是觀之挈壺之設其來尚矣



漢承周秦圖籍最備其令甲第六著當符漏品二十四  
氣各為二箭刻日所在并黃道去極晷景刻藪昏明中  
星於其下班之計吏自茲厥後踵事增華逮施於李蘭  
始變古法權器程水以準時刻唐之諸道率循此制至  
今器有存者而莫能施用唯司天官漏迄今用之參以  
中星因時升降而置箭之制世不復傳上躬至聖之姿  
極攸縱之美稽古典學勵精百度討論希濶講求禮術  
天聖中有今龍圖閣直學士給事中燕君肅始考七經  
戴籍作蓮華漏于梓潼來獻闕下其制為四分之壺參  
差置水器于上刻木為四分之箭箭四觚面二十五刻

刻六十分四面百刻總六千分以效日凡四十八箭一  
氣一易鑄金蓮承箭銅鳥引水下注金蓮浮箭而上有  
司唯謹視而易之言行漏之始又依周官水地置臬之  
法考二交之景得午時四刻一十分為五正南北景中  
以起漏焉時予備職樞府弗獲熟視君未幾作蕃青社  
建茲漏於白樓予出守汝陰亟往代君因得細睹其制  
精妙參神景祐中君復厭承明求利于頽予亦內徙睢  
陽封圻接畛慶問時通因請更為頽漏以廣其傳君由  
是再考晷度以梓潼在南北古法畫增一刻夜損一刻  
青社稍北畫增三刻夜損三刻頽處梓青之間畫增二



刻夜損亦如之仍作屋祕漏得夫愈密予舊隸史局粗  
親此學以為乾體左旋七曜運舍皆動物也赤道橫帶  
黃道斜截復有進退夫物動而有進退者勢久必差故  
昔賢制術以天度乘晝夜漏減三百而一為定度以減  
天度以為明加正度以為昏所以追晷景之實防節氣  
之差然三百歲斗歷改憲而異人出為今燕君其當之  
乎夫六藝羣書唯天文數術探頤索隱鉤深致遠最為  
難明若心所不達雖通人前識詎測其方而世之俗儒  
或以為非薦紳先生之所稱道何其誤歟仲尼作春秋  
每於朔閏發文以宣明歷數此聖人之深意也書不云

乎敬授人時禮不云乎百度得數而有常後之觀者幸  
無忽焉其漏志一篇亦刊諸左方期於不朽云爾銘曰  
極星建中黃道營外度有邇遐時有明晦聖人觀象古  
史貽則孔壺為漏浮箭為刻資始巧歷稽合小餘重黎  
是司義和是圖秦氏遺法漢京垂制歷世彌文舊規加  
麗玉此吐水分灌而壺於龍轉注下激衡渠天道可觀  
神化無跡日運波澄氣分箭易原本脫四字都邑屢遷寂寥  
因詔世失其傳猗嗟燕君文學餘力博貫舊章肇新景  
式象魏既登潼川既營建於青闈作於頽庭五夜持宵  
三商定夕杪忽無差升降靡息意侔造化數窮天地茫



茫有生孰參其知於鑠聖宋世祚無疆刊此樂石永憲  
萬方

瓊臺雙闕銘

瓊臺峩嶷左右如闕直上相等蘿交蔓結啟閉雲氣出  
入日月干流若綫羣峯如肩凌霄壓海吞吳跨越

石橋銘

山壤獻靈融結推功穹窿石梁飛雲架空垂流下激絕  
岸旁通煙華溟濛矯矯翔龍朝日曛曉蜿蜒騰虹願接  
天孫以助登封

三井銘

石罅山半三井如鑿圓不可窺深不可度亂澗四入飛  
流外落墮石不盈驕陽不涸冷激松檜碧混崖崿山靈  
所衛神物攸託簫鼓一鳴雷雨間作

案此銘原本闕今  
據北宋人小集增

洛西銘

商祚不永帝辛失御百神受其嫚褻生民墮於塗炭西  
伯昌既脫美里之禍陰圖王業將欲以利易其心以德  
勝其暴以為罷長夜之飲却靡靡之樂省其狗馬陋其  
苑囿皆不足以警天下之缺望懷百姓之歡心乃獻洛  
西之地請除炮烙之法紂許之夫以仁義而勝殘虐以



洛西而易天下萬民之心已歸於周而獨夫莫知之也  
吁君殺而臣宥上斂而下施者鮮不易地而處矣使西  
伯先堯舜之世修諸侯之德猶不暇况天子之事乎蓋  
飢者易哺寒者易衣凋敝之民易歸亂世之惠易行為  
人君者其慎德歟君子曰牧野不能亡紂亡紂者炮烙  
也岐陽不能興周興周者洛西也有經其地者立碑以  
載辭修辭以達意庶千載之後知文王之心哉銘曰  
獨夫驕矜牝雞晨鳴炮烙之刑虐生靈兮文王翼翼撫  
然心切獻我疆場去非辟兮紂得其地周得其義兆民  
之意知險易兮惟洛之右商禍之首諸侯心疚天絕受

兮惟洛之西周德之基四海心歸天祚姬兮洛郊如砥  
周道如失德音不已垂千祀兮

秦東門銘

夫夏之亡也湯得之以仁故卜年四百商之亡也周得  
之以義故卜世三十周之亡也秦得之以力故敗不旋  
踵蓋嬴正以區區之秦闕觀關東暴師二十有六年而  
削平區夏分為郡縣為武之力亦其至矣柰何取之不  
以道守之不以德信任宵臆慕於權勢峻文酷法樂於  
誇大嘗經東海上胸縣界中立石為秦東門以表其功  
業一旦官車晏出神器失守匹夫大呼社稷綫絕為國



之弊一至於此孟子有言曰域民不以封疆之界固國不以山谿之險威天下不以兵革之利誠為天下之道哉後有人經其地而為銘以識其事銘曰六王伏劔秦道益昏丁男北戍雲罕東巡經於上胸薄於海濱立石峩峩為秦東門刑政不殘鬼神不擾秦無東門秦不為小兵革既喪禮樂既壞秦有東門秦不為大夫厭秦荒禍起蕭牆函谷不守豈暇四方東門之中天設局鏑納漢以興閉秦以滅我經其所塊然遺址刻此堅石以識秦罪

焚書坑銘

秦焚經籍尚法令人知其禍而未知其福焉夫舜死陟方則禪受之道缺有夏多罪則篡弒之風起蓋受天命觀人事而作故君子不謂之暴而嬴氏以區區之秦闕覩關東刮兵剝糧竣刑刻法幸六諸侯之弊盜據神器累世之禍積於宗廟兆民之怨盈於城野炎漢之聖伏於豐沛是時苟能右詩書敦禮樂修人文而黜吏議祿冠纓之士行帝王之術雖累世之禍不得發矣兆民之怨不得泄矣炎漢之聖不得章夫而秦反枕干盾衽金革貴刑名而害仁義官甲冑之夫馳戰霸之塗故宗廟之禍得以發矣城野之怨得以泄矣豐沛之聖得以章



矣夫是坑也焚於斯禍於斯福於斯焚書也禍秦也福漢也詩書不亡無以速秦禍也未有削平敵國分為郡縣不數世社稷魚壞而不可救者也禮樂不墜無以速漢福也未有起布衣提三尺不數載大統畢集而不可危者也蓋文之於國猶水火哉無一日之可暫去也秦失天下也故禍之易也漢得天下也故福之易也君子曰國之將亡文先亡矣未有守文而不能救世者也斯文之道如天地焉如日月焉覆之載之照之臨之非可息也秦之焚書焚秦也文道非可焚也客有經其所為碑以銘其事其辭云

詩書禮樂加於焚燎爛赫也維煙歛天表凝為災星秦祚以天融為王氣漢德以兆正宗秦祀非棄文德天禍秦毒非禍王國斯文何損如日月食道不可屈明不可息神契人合羸不血食原本脫四字文乃鼎沸煙復為仁燼復為義大儒蜂午振鐸而起心揖神遂口傳天意皇皇六籍且經且緯赫若煙爛燦如烽燧斯文之聖因焚而試斯文之道因焚而熾俾我儒德後王之畏不敢侮慢以速禍戾原本脫四字吾知可責秦滅漢王是名銘誌

補封狼居胥山銘 并序

予嘗讀漢書至武帝即位之二十四載將軍去病出塞



捕敵封狼居西山而還紀傳皆闕其銘遂為銘而補之  
云

維漢元狩四年上以去年匈奴寇我北境至於定襄分  
命諸將耀武窮絕奉行天討驃騎將軍冠軍侯去病總  
十萬衆出右北平甲冑鈇鉞遠飾天怒禮信為器行列  
畢整精誠貫白日銳氣凌秋霜金鼓相應有不可辱之  
聲旗物相望有不可奪之色矛祭雲靡號令風動約輕  
齋絕大幕越二十里既俘張渠乃繫車耆迨左方之兵  
慙度難侯濟弓廬竒兵翼張犄角相嚮取旗鼓鑿酋帥  
執訊獲醜踰七萬級掃平區落推揚帝威南轅反旆歷

于山川遂禪姑衍臨瀚海封狼居胥山式表漢德從事  
承命是為之銘銘曰征朔幕兮振元戎犁王庭兮剪元  
兇車騎旋兮氛祲空刻隆石兮山之峯永萬年兮漢之  
崇

女懷清臺銘

女懷清臺秦所築也寡婦清采丹擅利以財自衛始皇  
客之為之築臺於巴蜀夫婦以客則非典臺以旌則非  
禮蓋王者之客有二曰二王後正三統也曰異域正朔  
之所不加也國家之旌有四曰貞曰孝以侑民也曰功  
曰德以礪臣也而婦越閨戶預外事是非貞也圖貨殖



志盥饋是非孝也採丹石棄織紵是非功也抗君禮乖  
婦儀是非德也客之不足動貞孝適足教民以慢上旌  
之不足崇功德適足化民以末作秦嬴之心何以言哉  
史遷曰豈非富也夫富而容之富而旌之則孤老窮瘁  
之民受殘於并兼之室貞介孝義之妻仰首於豪戾之  
婦語不云乎放於利則民多怨於戲古之致民於富壽  
者禁末事戒游惰丹漆金錫之類非貢不入於太府骨  
革羽毛之物非時不登於器用省徭役薄賦歛循天時  
廣地利君籍田以勸耕后親蠶以勸織故民倉廩實矣  
衣食給矣實則富夫富則樂矣樂則和矣和則壽矣哀

哉秦之為政也及是貴寶貨而賤耕織厭編戶而喜商  
賈婦非所表而表之表貪競也臺非所築而築之築禍  
亂也貪競起而王業衰禍亂長而宗廟墜秦是用亡臺  
之罪也客有延想往事勒銘遺基思有以戒之也銘曰  
童羊無角牝雞無晨陰不可唱以已循人戾哉寡婦鈞  
禮亡秦築臺于蜀以感下民崇臺昂昂秦女所亡不守  
惟薄乘夫擅陽崇臺嶷嶷秦民所息怠棄隴畝採採丹  
石蠶絕桑死女不務織土乾種腐民不務食婉婉盥饋  
秦女為仇服田力穡秦民為讎貨殂是積玉石是求以  
要旌表以客冕旒茲臺未成秦毒也盈茲臺未傾秦廟



已平吾恐蜀民以秦為明吾恐蜀女以婦為貞棄德遂  
利寢潤風行故撫秦罪荒址是銘

文莊集卷二十六

碑銘

傳法院碑銘

宋 夏竦

撰

太宗至仁應道神功聖德文武睿烈大明廣孝皇帝以  
太平興國七年六月建傳法院于太平興國寺今上體  
天道法仁明孝德皇帝以景祐二年六月特詔史官追  
頌先烈史臣某拜首颺言曰唐氏中微五代多故三辰  
昏慢九服煨燼虎爭龍戰糜沸雲擾我國家題五精之  
期起千歲之統祛天地之否隔極夷夏之塗炭翦寇劇



以靖搖亂誅僭劇以遏橫騫太宗皇帝張天弧順十極  
驅除戎狄駕馭髦傑制禮樂於已壞振文武於將墜奉  
藝祖以造大業由太弟以纂鴻緒歸馬論道投干講藝  
覆露所及輟迹所到因不闢皇衢剗霸軌一文軫齊量  
衡者焉泊乎六幕謚寧中宸閒晏振靈簡訪幽經觀天  
人之交探神明之奧補綴漏遺講求希濶朝夕之議必  
稽於典冊小大之政咸本乎根抵嘗謂佛法之至也百  
王不易歷世彌盛中原之區宇絕域之種落戶諷其書  
家圖其像一睇宰堵一嗅蒼藓或因受以悟法或睹相  
以趣善感照以應羣動廣大以攝萬有裨德教省威戮

其來尚矣先朝乾德中臨遣僧行勤等一百五十有七  
人各賜裝錢訪經西域今繼有還者嗟其翻譯之廢載  
祀二百非國家則平多壘奄宅四海通道夷貉暨聲蔥  
雪大事因緣疇能復之會廊時守吏王龜從上中天竺  
印度僧法夫梵學比丘法進所譯經又北天竺三歲天  
息災與其受具母弟施護各持梵夾來獻符帝雅意天  
實啟之乃遣內侍鄭守鈞肇營茲館賜息災法天等宣  
譯命光祿卿湯悅等潤文法進等筆受綴文義學苾芻  
慧達等證義高品王文壽等監譯由是憲前軌稽秘藏  
依金剛界拈種子壇書字源布聖位三成藻飾四事莊



嚴三藏主譯於壇北梵僧證梵義證梵文義學僧證義  
刊定華字千左右潤文東南以資筆削監譯西南以肅  
儀律新經既成制蹕臨幸資物有品詔賜金額歲給殮  
錢一億六十萬度僧十有一人翻譯之制大備於茲御  
製三藏聖教序以冠經首息災賜名法賢又詔擇京寺  
童子得惟淨等五十人令肄梵學每大電紀辰貝多啟  
譯經成奏御召對賜坐進見甚寵觀者榮之真廟紹文  
鴻徽累盛舞羽而清河右再駕而羈幕北鑾旗駐於茲  
館篚幣班於法席洎乎勒園封禪梁趾上儀交舉盛節  
咸備擁九清之嘉祐訪三空之真諦祇適先訓布詔睿

藻作聖教序以賜之又詔參知政事趙安仁等并所降  
制詔賜名大中祥符法寶錄復以宰臣丁謂王欽若充  
使以寵重焉聖上慎徽祖服光啟宗範長養容覆極兩  
儀之大德睿哲廣運總列辟之能事盡美乎萬幾宣精  
乎三教悟然燈之授記當彌勒之囑累以無上之知覺  
建大中之教化述三寶贊以冠藏錄衆聖歡蹈羣生依  
怙雨花芬都金光照爛恩深歸救之本理極名言之表  
無量功德非思議之可及也自興國士午距今乙亥五  
十四載寵靈積累妙因殊勝有若今右僕射同中書門  
下平章事呂夷簡以師臣上袞博達空理奉制兼使今



參知政事尚書吏部侍郎宋綬以宏材碩德了悟真際  
被詔潤文有若故樞密使同中書門下平章事王曙參  
知政事張洎趙安仁樞密副使楊礪翰林學士承旨晁  
迥李維翰林學士朱昂梁周翰楊億皆以學通儒釋繼  
司譯潤上哲清流盡在茲矣翻宣表率則有三歲五人  
皆賜朝散階累遷試光祿卿始法賢次法天次施護並  
刹帝利氏深窮秘密博通華竺功成順化卹禮尤異又  
次法護比天竺憍尸迦氏始隸毗尼律修禪誦先朝以  
其至自西遐該明法要令嗣譯度次曰惟淨故吳王李  
煜之猶子七歲依師選習梵業真皇以其不游西度精

曉貝文特命主譯天聖中法護請還身毒惟淨求徃闕  
塞累表不允今皆際會昌期宣隆教典者焉其監譯內  
侍則自文壽至今內藏庫內常侍陳文一御藥院入內  
供奉官閻士良印經院入內高品朱若水有七人皆簡  
擢恭恪以幹院事其筆受綴文證義等僧則自法進  
至今文一法凝鑒深慧濤潛政清漏善初義崇慧素存  
行及梵學僧文涉道隆慧燈七十有九人皆妙擇行業  
以塞朝選其貢經五印度僧則自法軍至法稱八十人  
取經還華僧則自辭潮至婁祕一百三十有八人皆克  
遂至願贊此大緣寵賚之數咸有差次其貢獻并內出



梵經無慮一千四百二十八夾祕之院閣譯成經論九  
五百六十四卷續於藏室娑婆之界以語言文字作佛  
事原本體貌丞相寵數尊異其誕辰翻譯瑞場啟罷並  
命兩府衡弼傳香賜會著為永式夷簡等進詩稱謝有  
詔刊石譯館之榮於斯為盛說者云譯者釋也交釋華  
梵對傳句讀辨佉樓之筆簡韋陀之辭本政因以建之  
糝雜句以文之廣陰入之津梁續癡冥之燈炬宣我象  
教功孰大焉然而擬於法者空幾於真者靜染空尚垢  
知靜猶障若天遺照覺度禪定應現無方圓明具足者  
豈有髣髴於其間也哉但以千覺度人始自言語八歲

垂教必假文翰雙林示寂鷲嶺罷談五百年中皆稱正  
法三十四字廣衍右行充溢諸天靡迤東土非傳釋無  
以達華夏捨潤色無以足言志鑿五蘊之牖破三毒之  
網塞顛倒之塗決苦惱之海俾衆生竭愛流灌燬宅味  
甘露以清涼大士悟始覺證法身護神通而遊戲其六  
度之本源乎萬行之因地乎宜固諦方言練橫字審緣  
起正思惟貫穿宗極以了密義涉獵蒼雅以定華文備  
而不繁直而不畧訶四病之微細拂二見之邪執灑之  
海墨則諸佛下觀詠以潮音則百靈潛聽使廣劫之下  
知朝家崇建之美歎聖尊嚮之仁不其偉歟臣早遊



史閣嘗預譯場終以鈍根求補外職地如亭歷有生之  
累猶多筆若須彌象妙之門難盡上勤哀舊物俾圖懿  
鑠謹奉宸旨靡敢固辭議者以為聖上之建斯銘也昭  
貽厥之謀周天之追孝也尚記事之美陶唐之有文也  
光大度門能仁之悲心也守護正法有帝之鴻誓也宣  
是四美垂厥無窮乎龍天降格神祇歡譽永錫百祿大  
庇中區皇哉煥乎謹為銘曰西方聖人萬化幽贊兆啟  
於周法至於漢森沉天祿古經聲煥齊察甘泉金人聳  
觀機緣合應夢寤通靈騰蘭東入情景西迎翬像可傳  
繪事初形具偈難解譯法聲興魏晉洎唐正閏十九變

梵成華翻傳代有篆隸兼該典墳旁究八備咸精三難  
盡剖正元以降國步多艱戎笳沸路盜戟橫關悉曇罔  
學雷嶺誰攀法器幾墮慧命將殫明明上穹啟我有宋  
盡殫殘暴並蘇愁痛神武拓迹聖人垂統四貉同文五  
天辰貢皇靈有赫法寶增光精廬再考譯席重張半滿  
交顯疑偽兼詳六義垂範萬頌裁章竺典歲臻華經日  
續液金賁字彫瓊麗軸思文祖禰尊善導俗克昌厥後  
介爾景福皇帝孝思對越無極碑頌休烈載刊金石銷  
昭上乘博濟含識惟皇壽考時萬時億

慈孝寺銘序



維天聖四載冬十二月洛死副使入內侍省押班江  
德明被旨治故燕國英惠長公主第為佛寺資福於真  
宗文明武定章聖元孝皇帝始聖上以皇太后濬發鴻  
誓祗迪淨因圖創美名永昭慈訓三事之臣相與進曰  
陛下以聰哲廣運承燕翼之謀太后以寬仁勤儉膺顧  
託之重垂簾訪對齋居聽政雨露均澤榮悴畢霑日月  
並明忠邪洞判陽郊再卜歲歷五頒六幕晏清百嘉楙  
育此太后至慈以佑嗣聖景貺博臨陛下至孝以事母  
儀黎苗歡服在昔名寺方用具焉或以紀年或以盛德  
今願以慈孝為名庶稱道於無窮暉映於前代有制可

之仍命近臣銘於樂石臣聞東漢已還有天下者繼體  
承基尊祖親禰黃流王璿觀盥之享嚴高燎清壇外宥  
之容備屬象餘烈顧慕遺恩奉先之典有終欲報之哀  
無極或以佛國追福或以釋像薦靈旁行不流厥惟舊  
矣唐氏中微五代短祚寇劇搖亂羣雄紛擾載祀踰於  
二百歷世幾乎三十文輝昏侵山川圯裂空廬生荆棘  
郭郭成煨塵大塊之載欲空下民之命垂盡我國家天  
人合應祖宗重光並翦鯨鯢再造畿夏勝殘去殺解百  
王之弊紐題期立象擁五精之王氣憲洪範順乾則置  
國以建永圖刻霸軌拓皇衢納民以遵大道功有震疊



燁耀格天光表而太山之高未增德有旁魄曼羨蒸雲  
潤海而梁父之基未附上帝儲蕃祉而有待先聖膺寶  
命而惟新其宅蕃房踐儲印則三雞問寢四時省膳周  
文之孝德也尹正京轂寵綏都畿有虞之歷試也其步  
天階御神器則攸縱多能宣精道藝陶唐之文思也躬  
案六師外攘夷狄成湯之聖武也大哉以日躋之美承  
天贊之業仁經之義綿之根本於道德粉飾乎禮樂信  
以來遠忿鷲之兵寢虛以受人鯁亮之臣進萬景以之  
昭晰元化以之網緼包舉大寧參侷遂始故能延颺駕  
席蘿圖萃坤珍輯天瑞紀官立制克稍乎神物升中降

禪不顯於上儀郊丘頌祇曲里尊道秩無文以拜貺篆  
名山而紀迹均大賚賜明宥復太素宣至和子黎庶之  
恩豐賓萬靈之禮洽方將被靖館齊大庭而思帝所以  
甚歡厭天下之為累徹琴瑟而弗懼倦輿馬而罷游聖  
人入侍興居冠帶不褫太后親嘗藥石夙夜必躬靡愛  
牲牲徧走羣望再鑿圭璧並植三壇肩瓊檠而無功諱  
玉靈而周效於是祈竺乾之祕教捨沁水之名園行冀  
有瘳即程庶役靡獲夢齡之感終稽彤日之報弓遺鬣  
斷荆山之鼎空成鐘鼎酒清鈞天之遊不返宇宙慘恒  
人神震動六宮攀號萬國縞素皇帝起初載臨宸極章



明百度履德包元以儀形乎風烈皇太后恭遺制保重  
熙平決萬樞博照兼覽以對越乎威神以為能類帝者  
聖人善饗親者孝子乃緣先朝之意寢講招事之文以  
真皇之受元符膺秘託層宙之顧懷也始嚴安聖之殿  
於玉清之廷奉諄誨迪璿源六羽之監觀也繼作奉真  
之殿於靈景之館又以洛師吉壤藝祖降靈有應天之  
院睢陽奧區王業資始有鴻慶之宮四範睟容並安寶  
宇畫漢祖龍顏之妙璿開元玉石之華皆衣冠是游旒  
宸如在薦櫻獻鮪馳傳相望濡露履霜因時增愴又以  
為禴祀極乎禮異幽贊之宜哀戚竭乎情無名助之禮

乃復疇近職命有司申述緒言繼成曩志即鳳臺之餘  
趾建鹿苑之精廬因舊垣而不廣慮民居也鳩庶工而  
惟簡形人力也

原本闕  
三字

祇植之園設像兼顧成之廟巖

洞隱飾疑堂邑之山林讚頌傳聞變乎陽之歌舞回廊  
四注飛觀相臨落斯千之雅章成春秋之逸事以五年  
冬十月詔釋練僧三十以奉重修置淨人二十有五以  
給灑掃設官守之局俾德明以董之議尊奉之制命太  
常以參之先置禁中肖像文考是月壬申乃率通臣戒  
宗室尊自天章之閣至於會慶之殿紫幄奏香空歌違  
且翌日羣后晨謁百靈備從申命上公奉安於寺之崇



真殿緇黃先道儀衛清路幡華旗旆左右相見鍾磬笙  
簧前後間作帷帟設次簪紱在廷太史候辰攸司錯事  
言瞻殿榜出於宸翰飛毫舉鳳拂素騰龍孝德聖能並  
煥茲日甲戌上運法駕率公卿以奉馨薦越翌日太后  
御琯輿總嬪侍以獻令芳都人隘塗軒車擊鼓或鼓舞  
蹈德或感泣懷恩望帝卿之雲慘淒共色聽魚山之梵  
讚歎相趨先帝付受之道光矣後聖恭事之禮至矣書  
所云克篤前列詩所云聿追來孝者也史官奉詔謹為  
銘曰有宋赫赫兩宮明明慈昭神育孝總天經思文真  
皇悲哀罔極魯館方虛給園斯闢斗城北望廣路東披

采楹叢倚紺瓦翬飛寶網羅空金繩表道滿月光明青  
蓮相好有殿中峙實奉先朝彫雲麗幄綺棟陵歌隆準  
如生清輝若在祇薦馨香疑聞馨歎供帳咸具服御畢  
陳履綦雖遠手澤猶新閒館旁連藻局相屬庭有寓龍  
山多疊玉嚴衛岑寂靈游往來雨華紛馥颺馭徘徊日  
監孝思永錫純嘏時萬斯年在宥天下

大安塔碑銘 奉勅撰

有宋封禪後十祀建大安塔於左街護國禪院從尼廣  
慧大師妙善之請也今上寶元體天法道欽明聰武聖  
神孝德皇帝在宥之十有七載詔史臣書其事從尼慈



懿福慧大師道堅之請也妙善長沙人姓胡字希聖母  
既孕不茹葷妙善勝衣志求事佛馬氏之亂畧為姬侍  
嘗被毀逢怒憂在叵測默誦普門名稱舍利見於額中  
馬氏異而禮之國初宣徽使兼樞密副使李處耘南定  
湘川得之即印嘗以素誓未伸斷穀謝病夢異人曰我  
文殊也汝第食勝緣近矣明年處耘捐館遂依洛陽天  
女寺削髮受具徃來兩京高行著聞太宗皇帝以椒塗  
之舊錫以懿名被之華服大姓袁溥捨第起剎賜額妙  
覺禪院令妙善主之自是肅禪儀練律學結瑜伽之會  
演華嚴之說五陟岱山一汎泗水皆中貢護送傳舍供

擬皇帝巡狩河朔刺血上流璽書褒嘆是時萬年中參  
恩愛眾異宸闈進見禮教踰等贈中書令忠武公李繼  
隆每以保阿尊事尤謹洵元符降格法御上封妙善即  
朝日之郊卜布登之地諷甘露法品祈東禪靈祐帝意  
嘉之賜名護國天禧元年湘東遂谷有鉅石重累數十  
百丈屹若浮圖昔隱今見詔遣使索視建寺度僧以旌  
其異妙善志徃瞻禮有大弟子道堅以師臘既高衡陽  
云遠懇留不已先事以聞翌日妙善請告南遊真宗曰  
汝老矣何遽遠適如來性海隨處現前儻有至誠皆可  
供養妙善遂求建今塔特詔許之會江寧府長干塔成



繪圖來上促召妙善于護國將賜之道堅在妙覺地近  
先至訪對稱百受圖以歸首事創規實始於此由是洎  
日置泉肇基寶梵治金礮石作于地宮將祕莊獻明肅  
太后所賜馱都逮妙善曩得佛骨會妙善示滅盡以塔  
事囑累道堅妙善享年七十有六尼夏五十有五宮闈  
震嗟賻贈加品建坊立刹賜額寶勝以道堅兼主之道  
堅盡禮蒼敝入謝局禁且陳妙善遺誓云此塔今世不  
成來生願就先帝測然賜以潛邸珍玩三千萬直仍命  
內侍分董其投明年春法堅製金觀寶函納前舍利等  
入奉于內道場贊唄三夕兩街威儀導自滋福殿帝薦

香以送之季高協吉歲于石室五年繼賜乘輿副物貨  
鏹萬緡以更餘費乾興初又以塔心殿棟須合抱修榦  
既遠未獲貫於皇帝上方以天下為公且重違其請莊  
惠太后時為皇太妃乃以奩金三百萬輸於內府市材  
以施之天聖改元內出明德太后寶器價二百六十萬  
洎莊獻服用千餘萬付之公帑易金銅鑄輪蓋以施之  
美哉四門九級岌業天中十盤八繩見曜雲際道堅又  
以巧墁雖畢丹采剗剗未完徧募檀信獲緡一萬八百  
洎法堅稟給餘貲三百二十萬以償其工上繼志有嚴  
奉先惟孝宅心凝覺追福太宮由二級而上命奉安禰



廟至宣祖皇帝四室神御並列環衛拱侍左右自餘緣塔功德未具者皆省服御成之由是賢劫之象薩埵之容五佐星緯八部人天分次峻層周不成備七年功畢詔賜茲額金榜始嚴巖駢臨視談贊立尼賚紫方袍并賜近院官舍九十區儼直充供明道二戴上給白金五十鎰俾營獻殿先有陳元度捨僧伽像張延澤施羅漢像頗極精巧道堅復建二殿夾峙於塔以奉之又營諷法華孔雀經二殿以次之景祐中上賜錢十萬創二樓於塔前右安特旨所賜龍藏乍香輪以轉千函左挂莊惠所捨鍾樹彫格以維九乳其斜廊壁繪羅漢迦文像

亦莊惠之施粵自營創建夫圓成則有宗藩施三門洎無量壽像鄧國貴主施報身像尚宮武氏施法身像朱氏施樂師像何氏施下生像晉國夫人張氏施工繪獻殿壁潁川郡君韓氏捨園于西戈水杜航捨地于東及其季尚繼獻金錄壽春王文獻緡錢義學比丘瑞琛指教相文字比丘惟儼著塔錄吳門應德興為匠石皆道堅願力所召共周能事者也厥初妙善嘗夢塔相止於雙足談者以為土足善繼之祥也塔成忽一日遠望如失雷祇環遠之異也道堅故通事舍人杜志儒之女母明德從父姨再適故殿前指揮使武成軍節度楊信封



隴西郡夫八道堅生九歲即齋素十有一求捨家興國  
八年剃度得伽明年賜紫伽梨十有六授慈懿師名嗣  
掌妙覺月給俸料三時賜衣歲度僧廡紫各二隴西夫  
人隨子剃染暮年歸寂道堅天機警悟資性嚴整有八  
丈夫風槩嘗誦法華千宸華嚴首楞淨名圓覺皆數百  
過記憶教藏該通大義塔之規模盡出智匠總三院之  
務安數百之衆以慈悲攝頌志以精通攝懈怠故能念  
舉而物應身動而衆隨羣蠢表異纖鱗示應作大因緣  
終始圓就明道中詔加福慧之名嘗談經於觀文殿有  
旨賜尼衆食料道堅以為出家分行折伏驕慢赴請之

飯猶起諸漏彷徨移晷切辭仰給每院但受月廩作糜  
米十斛聞者與之謂其知分夫以柔弱之賦婉孌之姿  
其間具明淑之德習師傅之訓不過佩服詩禮蹈履謙  
祇體蘋蘩之柔絜法山河之容潤而已其能斷棄愛染  
脫離塵垢以堅固為佛事以勇猛趣實際濬發心華坐  
空蘊樹者何其偉歟古之后族出入宮掖憑藉聲勢狙  
伏恩澤外交王侯旁出姻援不期驕而自速靡羨侈而  
極懷載之前聞為鑒來轍者有矣其能委遠光寵杜絕  
徼望辭榮於宗屬等志於貧賤以喜捨化俗以高潔自  
持者抑為難哉宜乎萬乘待遇六宮景慕成支提之上



緣到無生之彼岸者也於戲是塔庀功二十年規平三百尺高二引有六丈經用一億勞廡他舍無慮五百楹自非景祚和平累朝信奉設有大願烏可成邪是知諸佛慧命其待時而興也夫議者皆以為聖上於是塔大美者四中出寶幣形民力也日就勝因暢先謨也敦勸於下使趣善也命書厥勞庸展親也所宜鬼神潛衛海域延仰永集純嘏施及懷生者焉臣早預翻經嘗更約史仰破臺札靡敢固辭謹案塔者梵云窣堵坡此云靈廟在於諸天則藏佛爪髮衣鉢在於西度則記佛降生經行演說圓寂之所一以表人勝次以生地信三以報

重恩四果之位能超三界故有初級至四級者如來出十二因緣故極於十有二級焉迦葉滅後婆羅奈王起七寶塔為作銘記豈非刻石之識抑有初邪或問古今哲王之尊黎庶不專講六藝而參用三乘豈其大抵同歸於善乎臣嘗試論之夫有生之源本始清淨寂則絕待於一物感則資始於萬緣至靈無方至虛善應覺者則圓通罔礙湛寂自然內不立於寸心外無累於羣境不為世界之所流傳不為幻妄之所變移迷者則奔馳萬有昏翳五欲習動而不能靜入業而不能捨失本明而不知沉諸趣而不恨所以能仁愍之出現於世法不



廣大不能包種性喻不善巧不能破根蘊窮理而至命  
象繫之旨也率性而達道中庸之意也好生惡殺仁義  
之均也防非致和禮樂之則也聖人以為外挾世訓佑  
生民內可以澡心源還妙本所以崇其塔廟尊其教戒  
自東漢以來歷世多矣其間執分別之論起歸嚮之疑  
廢之而逾盛毀之而逾信豈非言底乎不誣理真乎至  
當者哉昔有人云百家之鄉一人持戒則十人淳謹百  
人和睦夫能行一善則去一惡則息一刑一刑息於家  
則百刑措於國以此觀之則斯法之來裨我之治蓋亦  
多矣上具大智慧有大威德神道以設教文明以化人

入內侍省押班周懷政以慎重齊明嗣掌其事皇城  
司新堂遂改為元符觀及承珪私第曰東宅公之通濟  
坊私第曰南宅皆碧輦停颺之地太霞頓轡之所瓊干  
素羽藻衛常嚴玉籟雲鈞遺響相繼唯公得奉見給使  
恭侍左右焉九年秋霜露纏憂龍蛇起嘆王人臨視太  
醫承認使者半道帝夢於來言玉館在庭公知其獨召  
有加之際真誨復宣曰慎密類汝者少塑形於景靈宮  
為吾輔勿憂初公居甘泉坊第徙居南宅疾亟遂還甘  
泉坊以十月乙亥啟手足享年五十五上嗟悼久之命  
懷政監護葬事贈鎮南軍節度使仍塑像於景靈宮天



興殿之左達巷之香顯十旬之異特弔之客有雙鶴之  
竒以十二月中甲寅於開封縣之汴陽鄉柵岡村娶渤  
海施氏累封吳興郡君以公昭贈加等特進封本郡夫  
人夫人生於景胃夙茂於閨風同穴之言嘗盟於皦日  
偕老之痛蓋極於帷堂子四人日世寧世長世昌世融  
並任右班殿直學禮而立象賢以成既冠勝衣已聞於  
警悟作室肯構佇見於蕃昌女四人姆訓甚嚴淑德皆  
備奉嬪慶旅未開鳴鳳之祥率禮公宮將奉采蘋之祭  
而皆靡瞻顙泣何怙銜哀孺慕無時柴毀過禮有後之  
美豈曰誣哉公通簡有常慎默無比自肅祇真騰傳致

解脫為寶篋哉此無價珍非空亦非色遠謝修證垢並  
祛照覺陰水澄滓乃去火盡灰亦求法縛既解降神通  
自遊戲若於權實際猶有一微塵欲求見如來尚隔須  
彌聚佛祖秘密印華梵微妙言語默及思惟不越於此  
義後之登塔者應知建塔因蓋表調御德起發淨信心  
掩日不為多聚沙不為少但能復本覺即成無上道朝  
家光四葉尊重於寶乘真祖創妙緣鴻禧昌厥後吾皇授  
曩記成此殊勝果壽考億萬年永庇大千界







